

華

陽

集

二





華陽集

(一)

卷一

華陽集卷十一

表

內中奏告立冬表

伏以四氣代遷。盛德在水。田收賦入。民樂維時。迎寒于榮。國有常祀。靈觀祚德。庶格順祥。

又

伏以景延圭下。和襲緹中。惟統氣于三微。甫施生于萬奏。臨祕殿之清夜。露寶薰于大霄。庶將獨志之通。式貯繁釐之集。

內中奏告冬至表

伏以天地之元。陽施陰化。羣物萌動。嗣興歲功。于時嘉休。大被四極。匪神之造。曷以順宜。竭誠致精。尙或感格。

南郊禮成奏謝內外諸神御殿表

天正之吉。景氣晏休。自宮徂郊。稱秩元祀。萬祥來下。蒸被羣生。緊保有之。如克有就。

明堂奏告內中諸神及在京宮觀表

伏以嚴烈考之配。交上臺之歡。迺涓路寢之居。以倣合宮之制。乘秋季序。秩古遺文。敢薦至忱。期導來祖。明堂禮成奏謝內外諸神御殿表

屬者酌皇祐之典。奉合宮之祠。嘉盛薦芳。美樂象德。誠孝孚盡。休祥顯臻。洵成曠儀。實荷丕蔭。

明堂禮成奏謝諸陵表

伏以九筵脩配。萬玉相成。孝盡人倫。報明天道。願守鴻業。洵稽闕文。迨錫壽符。舉欽靈睭。

又

伏以紹綏寶圖。躬緝大祭。九秋獨吉。五室會精。鴻儀釋陳。嘉應顯見。惕懷先訓。遂格曠文。惟祚之休。曷報之極。

修神御殿權于觀文殿奉安祖宗御容表

伏以邦釁如昨。年陰載移。式瞻列聖之祠。將宅先皇之寢。旣圖新于靈構。爰庀事于嘉時。愾慕如存。式嚴遷告。

天貺節內中謝露香表

伏以上真眷命。丕迪于先猷。嘉瑞著符。游臨于華節。猥承洪緒。祇奉前科。是夕玉女來臚。青童侍案。關八素之祕字。露七晨之返香。伏願高通太清。陰相寶祚。監孚精志。垂錫大禱。

又

伏以炎暑徂威。靈書告瑞。表錫符于上帝。爰紀節于嘉辰。霽景澄虛。寶薰露夕。仰格九清之監。永孚萬祚之休。

又

伏以候隆炎律。嶽薦珍符。本祚德于昌期。夙標名于令節。就被丹除之地。高通紫極之薰。尙監涓衷。益孚永佑。

又

伏以圓穹胙德。皇歷儲休。循祖烈之重熙。記節名于嘉候。大廷初肅。甲夜正清。敢薦信于高晨。願侈祥于昌會。

天慶節內中謝露香表

伏以歲適開元。月方成朏。稽慶源于道祖。發靈貺于眞朝。願循眇躬。膺被大統。敢格肅忱之蘊。終蒙保右之私。

天祺節內中謝露香表

伏以天發珍符。候臨嘉節。仰企紫晨之境。躬爇清夜之香。儲思中虔。逆釐下委。追述先猷之奉。永期丕祚。

之延。

又

伏以寶歷擁時。肇應帝衡之運。靈符錫命。夙昭祖烈之休。顧嗣守于丕圖。方仰循于前矩。爰臨佳節。更屬精衷。

先天節內中謝露香表

伏以新秋薦涼。甲夜臨霽。肅肅祕殿。寥寥太清。燃芳上騰。迎福下墮。維高監德。與衆承休。

又

伏以孟秋初吉。甲夜載涼。太霄廓虛。景緯澄霽。躬燃寶炷。仰達至誠。欽靈監之昭回。委鴻禧之穰簡。願言烝庶。同保壽康。

又

伏以清秋冠序。嘉節紀辰。望雲景之杳冥。度蘭煙之馥郁。至精馳越。靈造感通。願錫殊祥。益隆永祚。

又

伏以孟秋初吉。甲夜新涼。迹遺事于祖朝。感下遊之眞駕。肆及眇躬之御。益虔靈顧之承。適履嘉辰。更孚精意。

又

伏以厥月孟秋。維時中氣。明發不寐。亡如事存。伏惟聖皇帝。威靈在天。功烈被世。瞻言僊御。來止眞祠。及茲搖落之辰。實增悽愴之感。奉承遺緒。居極永懷。

隆聖節內中謝露香表

伏以冬籥初寒。夜庭未艾。昔感飄遊之願。嘗膺神策之祥。肆纂丕圖。載臨嘉序。企九清之玉景。煥百和之蘭煙。敢薦至忱。庶孚永祐。

又

伏以候應寒籥。霄殿寶除。欽皇帝之肇祥。感上靈之降治。紀名佳節。錫祚昌期。爰洎纂承。益虔薰奉。

又

伏以寶祚之承。緬憑僊系。飄遊之下。顯著珍符。紀靈跡于嘉辰。凝異薰于祕殿。伏願上清降監。丕緒延鴻。陶庶物之阜成。格九圍之休靖。

乾元節內中謝露香表

願以眇生之辰。載履炎序。承天丕命。保乂有邦。側身寤興。思答貺施。靈薰之薦。庶格至忱。

乾元節內中奏謝祖宗表

臣以寡昧承基。託于民上。誕生之日。感愴先猷。晨食勞思。懼失聖業。在天流祉。以祐邦圖。

乾元節內中奏謝章獻章懿章惠皇后表

伏以紫掖留慈。報隆罔極。炎煒御氣。詳紀迺生。永懷鞠育之仁。莫及清溫之養。悼徽音之寢邈。斬後社之是延。

皇帝祈福諸陵表

臣嗣守大器。夙夜祗栗。懼不足以承祖宗之聖業。乃自春以來。積勤違豫。豈臨聽之不明。災咎所緣而致哉。惟靈心顧懷。使保有大命。以丕承于邦祀。不亦宗社無窮之休。

皇帝康復奏謝諸陵表

臣嗣守丕序。不敢怠遑。萬幾積勤。至于違豫。在天之監。錫福以寧。夙夜嚴祗。益謹靈戒。

南郊青城皇帝問太皇太后聖體表

臣某言。尊彙聖之度。見泰元之尊。飭萬衛以徂郊。候初陽而薦玉。遽違信宿之侍。重結晨昏之思。寒律御辰。嘉休相德。

太廟皇帝問皇太后聖體表

臣某言。茲者諏景至之吉。肇國陽之禮。乃飭齋輿。先薦清廟。疇獨成于孝饗。阻恭侍于慈闈。適履祁寒。仰

綏純社。

奏告永定陵表

伏以盛德錫符。夙啓休平之運。皇圖接統。長垂燕翼之謨。恭惟謚號皇帝。功格乾祇。道包繩契。恩留二紀。永深遺御之思。氣易中春。還及上賓之日。申懷罔極。致薦如存。

奏告永定陵景靈宮慈德殿表

伏以守長世之基。緬懷垂裕之訓。愴流陰之遽。還履遏音之辰。恭惟謚號皇帝。德厚同天。仁深被物。顧威神之如在。保運祚以無疆。施及眇躬。獲承大統。空極遺弓之奉。何勝濡露之思。

仁宗掩皇堂皇帝奏告表

伏以日月不居。几筵如昨。山川之勝。陵邑旣新。惕遵遺訓之書。阻從大升之駕。涓辰維吉。復土卽期。瞻法御以長違。結孝恩之罔極。

皇太后奏告表

伏以萬邦在疚。音遏舜庭。七月戒辰。陵開漢邑。應龍岡之嘉兆。掩玉劍于幽扃。風蕭騷而四鳴。日暝昧而西下。上漢之遊莫返。終天之恨何窮。

初忌酌獻永昭陵表

伏以春籥正闌。仙園何邈。空留言于玉几。已駐景于崑臺。適及遺弓之辰。靡勝濡露之感。就陳嘉獻。尙豎哀悰。

奏告福寧殿景陵宮永昭陵表

伏以靈輿厭代。已隔于僊游。駒隙流陰。忽臨于練祭。恭惟謚號皇帝。功烈被世。威靈在天。遺弓劔于橋山。陳衣冠于漢廟。爰歷上賓之旦。何勝永慕之懷。

又

伏以昊天之德。雖懷欲報之心。三歲而除。敢越通喪之禮。恭惟謚號皇帝。宅靜淵之德。躬神睿之資。自仙馭之升遐。忽素冠之終制。願言未遠。摧泣何勝。

又

伏以白日賓空。莫返乘雲之御。暮春感節。載臨遏樂之辰。恭惟謚號皇帝。稽古凝猷。參天布化。輯九圍之至治。遺萬世之不休。永惟大統之承。何極終憂之慕。

永昭陵乾元節酌獻表

伏以白日賓天。早促乘雲之御。薰風紀節。載追感露之祥。撫玉几以悼心。望柏城而賈涕。敢陳芳薦。庸達孝思。

仁宗禫除奏告昭陵表

伏以三年之喪所不敢過。閒月而禫。及此而除。雖哀變之從宜。惟孺慕之如昨。明靈猶在。摧殞難勝。

奏告英宗永厚陵表

伏以歲華易晚。冬律又中。馳愛景于層城。結重冰于太液。恭惟謚號皇帝。早膺靈命。歛厭神機。漢寢朝寒。疑玉衣之自舉。驪宮夜永。想金雁之空飛。載感流陰。益深遙慕。

正月旦起居仁宗永昭陵表

伏以淑氣回郊。鮮飄動物。履四時之首祚。蒙萬國之嘉休。恭惟謚號皇帝。聖德天臨。神謀世賴。橋山夜永。空悲玉劍之沈。漢殿春長。猶憶椒觴之獻。僊遊何在。哀緒難任。

正月旦起居仁宗永昭陵英宗永厚陵表

伏以窮陰謝節。端月應辰。破新萼于上林。動輕澌于太液。恭維謚號皇帝。睿謨經世。靈德對天。萬國貢珍。不見涵元之會。六龍奉駕。莫攀閔苑之遊。感嘉歲之載新。望仙園而增慕。

寒食節起居南京鴻慶宮等處神御殿表

伏以桐花初茂。榆火載新。瞻言仙馭之遊。舊載名封之祀。仰威神之不昧。感時節之又遷。惕奉遺謀。永懷孝慕。

又

伏以神榆更燧。春露零虛。瞻勝宇之雖遙。奉靈遊而如在。恭惟謚號皇帝陛下。茂經邦業。永繫民懷。欽法御之賓空。極遺仁之感物。願茲菲德。嗣守丕圖。惕惟先訓之承。優若時思之慕。

寒食節起居諸帝陵表

伏以桐華近節。榆火變晨。感景物于流年。愴衣冠于遺寢。遐企御天之烈。永詒垂世之謨。施及眇躬。嗣膺大器。每伏孝思之惕。敢虔時薦之芬。

又

伏以華林遺景。將修禊水之遊。并土舊傳。已舉藏烟之令。恭惟謚號皇帝履中天之運。詒萬世之謀。人避軒臺。終若威神之在。露零漢殿。空深忱惕之思。仙馭雖遐。嘉觴或顧。

寒食節起居諸后陵表

伏以春露零宵。屢驚節物之變。玉衣留御。永悼徽音之遐。肆守丕圖。遙遵慈訓。屬桐華之俯候。瞻羽駕以馳思。

又

伏以淑律向闌。感孝思之無極。仙園在望。愧祇謁以未遑。永言遺訓之存。施及眇躬之御。嘉辰又至。芳薦

惟恭。

六月旦起居仁宗永昭陵表

伏以氣應林鍾。日躔東井。候溫風之始至。感溽暑之將徂。恭惟謹號皇帝。仁澤具深。光靈未遠。神游安在。邈四海之所懷。仙寢空成。度百年而猶畏。深惟罔極。永悼何勝。

六月旦起居仁宗永昭陵英宗永厚陵表

伏以律中大林。日臨東井。被溫風于羣物。徂畏暑于層空。恭惟謹號皇帝。皇躬儉勤。聖德廣密。露團金掌。終成漢武之仙。雲滿蒼梧。莫返帝虞之道。威容如昔。慨慕何窮。

七月旦起居仁宗永昭陵英宗永厚陵表

伏以蓐收御令。夷則旋宮。感涼風之動辰。望流火之斂夕。恭惟謹號皇帝。積隆丕烈。慎固成基。萬務勞精。終損文王之壽。九清棲景。莫追軒后之遊。搖落驚年。愴悽盈抱。

中元節起居南京鴻慶宮等處神御殿表

伏以音移商律。景肅金行。火殺芒以流空。水凝氣而收野。伏惟謹號皇帝。功高邃古。澤浸涵生。瞻勝迹以雖存。想遊神之何所。適履夷傷之候。載深悽愴之懷。永念燕謀。往虔嘉薦。

中元節起居諸帝陵表

伏以方秋之初。維月之望。聽商聲于夷則。校仙籍于元都。恭惟謹皇帝靈德在天。燕謀垂世。戎衣清難。定業當年。羽仗賓空。憩遊何所。肆奉承于大統。固覆被于遺仁。載驚搖落之辰。重發愴悽之慕。

又

伏以斗建申中。月躔枵次。適及夷傷之候。可勝悽愴之懷。恭惟謹皇帝垂業艱難。詒謀燕翼。軒臺弓劍。葬在橋山。漢廟衣冠。游于複道。興言沖眇。嗣守平成。顧秋序之甫初。惟孝思之罔極。

又

伏以清颯肅物。大火流空。乘西顧之素輝。應中元之嘉令。恭惟謹皇帝運膺炎歷。德覆鴻區。保漢鼎之安。成萬世之基業。起軒邱之畏。著百年之威神。顧歲景之貿遷。悵宸遊之緬邈。永循邦訓。內忱時思。

中元節起居諸后陵表

伏以素商肇新。華月初滿。望山陵之喬木。當天地之肅辰。伏惟謹皇后位正坤儀。道符乾極。流徽音于來裔。濟睿烈于當時。興言眇躬。嗣守鴻業。適及戒寒之候。何勝追養之思。

又

伏以維斗建申。其神執矩。當陰靈之既望。中商律之始清。恭惟謹皇后沙籠鍾祥。河洲播德。早儼儀于乾極。奄淪耀于軒宮。猥念菲涼。獲膺統序。悼音塵之已邈。增悽愴之無窮。

又

伏以方秋之初。其月既望。氣始肅而用事。火西流而戒寒。伏惟聖后。配德純坤。徽音具紀。收神太素。懿烈如生。屬霜降之在辰。想飄遊之何所。有懷明發。罔極孝思。

中元節起居永昭陵慈聖光獻皇后表

伏以方秋厥初。維月既望。火流天而滌暑。露霑卉以舒芳。恭惟聖后。功協聖謨。德侔坤極。仙遊不返。感急節之徂遷。孺慕未忘。瞻長陵而摧咽。

八月旦起居仁宗永昭陵表

伏以維時仲秋。厥月初吉。飛上林之涼葉。動伊水之寒雲。恭惟聖后。澤被含生。福流後裔。龍輿御漢。驚歲月之屢遷。玉座凝塵。恨光靈之永隔。每懷遺訓。空積悲悵。

八月旦起居仁宗永昭陵英宗永厚陵表

伏以流陰易遷。素律俄半。涼風颯以荐至。白露圓而下零。恭惟聖后。至德幾神。休功澤世。人心永慕。終疑蒼野之游。天令空回。邇及纒章之御。載驚搖落。中積愴悽。

十月旦起居仁宗永昭陵表

伏以流陰變律。寒氣凝辰。風匝野而四鳴。日臨圭而初薄。恭惟聖后。皇帝仁深萬類。謀燕後昆。弓劍不留。

已掩橋山之固。衣冠猶在。空陳渭水之遊。冬序又新。孝思無處。

十月旦起居諸帝陵表

伏以氣正上冬。時維良月。候北郊之初凜。當萬物之畢藏。恭惟謹號皇帝。凝命中天。施功四海。神機厭代。早從上漢之遊。寶曆凋年。居極念親之感。光靈如在。悽愴何窮。

又

伏以場功初入。關旅既來。肇升一氣之嚴。時告百嘉之備。恭惟謹號皇帝。誕膺天命。保有皇圖。方聖德之澤民。忽神遊之厭代。九清留景。萬世垂謀。適更寒籥之初。益起寢園之慕。

又

伏以氣薄水行。景移冬陸。愴衣冠之遺御。忧霜露之時思。恭惟謹號皇帝。盛德參天。至仁懷物。雖游神于霄極。固貽羨于蘿圖。敢達至虔。以修常薦。

十月旦起居諸后陵表

伏以令主水行。氣乘坎治。國謹門閭之戒。農登黍稷之儲。恭惟謹號皇后。乘坤順之儀。儷乾剛之德。音流彤管。慈訓猶存。塵晦玉依。仙遊何在。寒威忽變。孝感無窮。

又

伏以顯帝御辰。應鍾合律。度寒風于廣野。馳愛日于層空。恭惟體號皇后。助德先朝。流光後裔。神遊上俅。久闕于椒闈。歲景易遷。幾周于玉歷。肇膺皇序。增惕孝思。

又

伏以北陸凝陰。洊更于冬律。九清留馭。緬慕于仙遊。恭惟體號皇后。德配乾行。體儀坤載。流徽音之雖邈。導慈訓以如存。敢達孝思。用申時薦。

十一月旦起居仁宗永昭陵表

伏以冬律又中。神游何在。動朔吹于石馬。下申霜于玉除。恭惟體號皇帝。謀翼世長。仁霑物厚。崦嵫日薄。空勞夸父之蹤。蒼野雲深。莫返帝虞之駕。撫節易感。懷恩豈窮。

冬節起居南京鴻慶宮等處神御殿表

伏以寶馭遊真。爰宅神于勝境。圭延晷業。盍慶賀于嘉辰。緬慕烈光。惕增孝感。冀敷靈祐。丕衍皇圖。

又

伏以一陽來復。萬物滋萌。驚時序之又新。奉衣冠之如昨。恭惟體號皇帝。履炎靈之運。恢皇極之符。慶流子孫之不窮。功齊天地之何況。適臨佳節。空積追懷。

又

伏以流年屢遷。嘉節環至。律應黃鐘之本。日迎南極之長。恭惟謚號皇帝。靈德在天。睿謀垂世。奉容衣于別寢。悼遺劍于昔遊。適臨天序之元。空起邦情之慕。

冬節起居諸帝陵表

伏以初陽襲管。愛景延圭。慶屬昭辰。感深遺御。恭惟謚號皇帝。功恢鴻緒。澤浸涵生。燕體在天。詒謀菲德。敢因時薦。庸格孝思。

又

伏以歲律更端。天元合統。祥起五星之會。氣滋萬彙之萌。恭惟謚號皇帝。乘運炎精。握符帝極。早游神于太素。空留澤于涵生。長至協辰。永懷垂訓。

又

伏以景延南極。氣動黃宮。亞輯玉于歲儀。發書雲于朝誓。恭惟謚號皇帝。寶有神運。大恢帝謨。惕循眇德之承。純荷燕謀之及。遵圖豈易。感節何勝。

冬節起居諸后陵表

伏以緹室驚和。又新嘉節。玉衣留御。寢逸靈游。恭惟謚號皇后。稟坤體之柔。配乾符之正。儲休寶緒。屬德眇躬。緬慕慈徽。惕申孝感。

又

伏以窮陰受謝。愛晷迎長。驚寶燭之初融。感芳芸之載馥。恭惟謚號皇后。體侔坤載。德儷皇居。塗山之賢。早興有夏之治。關雎之化。猶播在河之音。嘉節又新。先園永悼。

又

伏以漢歷推元。已合連星之異。洛圭定景。初迎至日之長。恭惟謚號皇后。德正坤符。體齊天極。不返瑤臺之駕。空留彤管之芳。永念詒謀。何勝感節。

年節皇帝酌獻永昭陵表

伏以太簇還律。青祇御郊。來方貢之萬珍。應農祥于東作。恭惟謚號皇帝。鴻名軼古。遺澤被民。下未央之庭。追晨觴于昔獻。望穀林之野。感春露之初零。皇訓是承。孝思何極。

年節皇太后酌獻永昭陵表

伏以窮律收寒。新陽發煦。動年輝于廣殿。變晨景于會林。恭惟謚號皇帝。早御聖圖。夙勤天綽。忽凝丹于軒鼎。已駐節于崑邱。載驚歲月之遷。空結園陵之戀。

年節起居宣祖永安陵太祖永昌陵太宗永熙陵真宗永定陵仁宗永昭陵英宗永厚陵表

伏以日躔虛次。斗建寅初。起歲事于東郊。動春華于上苑。恭惟謚號皇帝。隆名蓋古。厚澤加民。萬國來庭。

猶想獻珍之會。五陵連陌。空成拱木之陰。夙荷遺謀。內深馳惻。

年節起居昭憲孝明孝惠孝章懿德明德淑德章獻章懿章惠章穆章懷皇后陵表

伏以蒼精告辰。太簇中律。銷嚴氣于冰井。上榮光于露臺。恭惟謹號皇后。天合作祥。陰儀處順。仙山何所。應陪羽駕之游。春日空長。那復蠶宮之御。適臨改歲。倍積馳思。

靈駕發引慰皇帝表

今月二十日。扈從大行太皇太后靈駕發引者。臣躬持使節。祇奉靈輿。辭觀闕以啓行。僚郊扉而就次。恭惟皇帝陛下。受天至性。執古達喪。臨祖奠以長違。積孝思之鉅痛。願裁聖慕。以應輿情。臣伏恨總使在道。不獲躬詣闕廷。謹奉表稱慰以聞。

靈駕發引慰皇太后表

今月二十日。扈從大行太皇太后靈駕發引者。伏以龍輜就祖。天仗戒嚴。甫辭禁闥之途。已頓近郊之次。恭惟皇太后殿下。德宣慈範。養極孝誠。撫神座之初遷。愴徽容之永隔。願紆至慕。以介純休。臣伏恨總使在道。不及躬詣內東門。謹奉表稱慰以聞。

寒食節慰皇帝表

伏以大行太皇太后靈駕下宮。奄經寒食節者。仙游不返。春令載移。感斷火之嘉辰。留綴衣之遺御。伏惟

皇帝陛下、逢時忱惕、觸緒無窮、驚氣節之又新、愴音容之永隔、攀號摧慕、聖體難任、臣伏恨祇事山陵、不獲隨班詣西上閣門、謹奉表稱慰以聞。

寒食節慰皇太后表

伏以大行太皇太后靈駕在下宮、奄經寒食節者、天令荐更、春華歛暮、履藏烟之嘉節、撫憑几之遺塵、伏惟皇太后殿下、永懷徽音、內盡大孝、瞻厥儀之既遠、痛羨路之將闋、號慕摧傷、聖情難處、臣伏恨祇事山陵、不獲隨班詣內東門、謹奉表稱慰以聞。

掩皇堂慰皇帝表

臣某等言、今月十日、太皇太后山陵、掩皇堂禮畢者、池荒振飾、龜筮協謀、掩金駕于重泉、留玉衣于閒館、三辰晦象、率土摧心、恭以太皇太后、母儀三朝、有邦家之一德、力援二帝、有社稷之大勳、自經屬引之辰、肆舉就房之典、耕不倚耒、無踐雜田、鑿之傷、馬皆服車、無犇隄溪山之恐、嘉符衆見、熙事不成、茲蓋皇帝陛下、孝奏高穹、精通幽壤、雁飛銀海、雖闕景于千年、龍繞青山、終遺祥于百世、臣等伏恨奉使在道、不獲隨班詣西上閣門、謹奉表稱慰以聞。

掩皇堂慰太后表

臣某等言、今月十日、太皇太后山陵、掩皇堂禮畢者、筮宅之祥、既積封于甫窆、安臣之享、援精事于初虞。

愴極慈宸。涕零行路。恭以太皇太后。援昇先帝。定保今朝。德盛而無所名。恩闕而不可報。何奄鍾于邦。曩
遽絕睇于天儀。前詎先遠之期。丕舉方中之事。大升安步。曾路塵之莫驚。羨道長扁。俄陵土之已復。伏惟
皇太后殿下。欲養之心不逮。思媚之志猶勤。羽駕真游。已會在天之聖。龍盤厚壤。終承卜世之祥。臣等伏
恨奉使在道。不獲隨班詣內東門。謹奉表稱慰以聞。

請皇帝去杖經表

今月十七日。慶壽宮西序奉慰。伏觀皇帝尙躬重服。臣某等。忝陪近侍。獲奉清光。適臨既禫之祥。猶御始
喪之服。薦紳駭顧。若無所容。竊以日已就除。可謂盡三年之報。禮容順變。所以通一時之權。哀苟致于有
餘。過將同于不及。大行太皇太后。留仍几之命。載易月之文。如其尊行。允曰追孝。皇帝陛下。奉喪情至。予
物仁深。顧感時之無窮。在聽政之已緩。人心尙鬱。邦務未昭。況若苦慮。豈不極孝孫之慕。然存杖經。非以
合聖人之經。伏望退抑至懷。俯矜羣議。勉迪祖宗之故典。若稽天地之大中。易衰從常用。覆嘉告。

華陽集卷十二

表

謝兼端明殿學士表

伏蒙聖恩。授臣兼端明殿學士者。外孚皇藻。既冒寵于禁林。入奉清光。更加榮于祕殿。恩非常儼。望出意涯。伏念臣少起寒生。夙陶盛化。以孤童而就學。承素業之傳家。遽踵峻英之游。徧階華顯之序。嚴扃預召。自驚一紀之遷。從囊無言。空點兩朝之遇。加以介愚少與。讒訐積生。南國分符。惟望江湖之守。西清仄席。詎勝朝夕之咨。敢謂皇帝陛下。念學古之素勤。記受遺之前事。特下十行之札。申諭至明。使兼三俎之榮。莫容固避。雖曰濫賞。豈不戴曲成之私。猶能隕身。庶幾盡一節之報。

謝賜修實錄獎諭手詔表

伏奉手詔。以近傳宣。取索仁宗實錄二冊入內。特賜獎諭者。伏讀歎驚。戰汗失次。恭以仁宗皇帝享御天下四十二年。豐功茂烈。實配天地。宜得遷固之材。以論撰本末。著之無窮。先皇帝迺誤以臣等充詔。而歲月淹晚。未克就緒。伏遇皇帝陛下。始初清明。追悼文武。方虞罪斥。而特形手札之賜。奎壁宸謨。驚震羣視。雖前世史官。鑿蒙獎遇。未有若此之比也。臣某等敢不夙夜研思。趨成大典。勉以稱陛下褒勵之意。

謝參知政事表

伏奉制命。特授臣依前官參知政事。仍加食邑實封。尋具表辭免。蒙降批答不允。仍斷來章者。伏以誤奉
褒章。擢陪宰論。寵生望外。愧越情涯。伏念臣早緣薄能。得齒峻甲。紬書天祿。嘗進躡于並游。視草玉堂。空
載驚于采八。年陰游易。績用尤疏。專腐儒蟲篆之文。豈堪謀國。念平日江湖之思。止欲退身。間因對于清
朝。輒屢斬于閒地。未遂懷章之去。敢辭抱槩之勤。不圖淵衷猶錄。舊物方卽。俊心之宅。亦偕政路之求。矧
親決萬幾之難。力折百年之敵。圖事揆策。追前王之未能。聚精會神。索一德之同至。豈容迂學。獲廁近司。
雖固託于孤誠。終莫還于渙命。覲顏承詔。鏤骨知恩。茲蓋伏遇皇帝陛下。鴻覆兼容。大明獨照。謂中書政
事之本。非務于近謀。顧三朝侍從之臣。惟矜于樸守。臣敢不慎祇皇訓。茂緝天功。道在修身。將每宵而自
惕。義形報國。視九死以猶生。

謝尙書左僕射表

伏奉制命。特授臣尙書僕射兼門下侍郎。加食邑實封。尋再具表辭免。蒙降批答不允。仍斷來章者。伏以
揚大廷之命。躋上輔之班。總治中臺。兼官東省。榮無他儼。懼不自勝。臣竊考詩書之文。概見君臣之際。或
懷材而志罔克顯。或得位而時不足爲。惟上下之相求。實古今之鮮合。遘茲絕會。實在昌辰。加官制之肇
新。偉帝功之丕就。正三省以出納。王命之重。分六卿以紀綱。邦治之蕃。宜擢廊廟非常之賢。以輔朝廷不

世之業豈容非據。能濟厥成。如臣者。間歷憂艱。而學浸衰。晚更寄屬。而心輒殆。任重塗遠。每懷顛躓之虞。身老退遲。已昧盈虛之數。敢意褻言之下。更鑿異等之除。避牘載陳。僉言曲闕。洎勉承于殊命。顧何處于厚顏。伏遇皇帝陛下。大講闡文。終憐舊物。雖務精于名實。亦過飾于陋愚。且寵深則知命之爲輕。位高則知責之愈重。心其許國。敢金石之少渝。義切愛君。惟股肱之一力。誓堅白首之節。仰答大圓之私。

謝門下侍郎監修國史表

近奉制命。除授銀青光祿大夫。兼門下侍郎。同中書門下平章事。監修國史。加食邑實封。尋再具表辭免。蒙降批答不允。仍斷來章者。伏以孝奏上圓。甫格神娛之祉。恩先百辟。亟頒庭渙之文。方固避之靡僉。第因榮而爲懼。伏念臣議不足以勝物。才不足以濟時。被皇心之獨知。當宰政之大務。然而責深于持國。是非之際。怨積于背上。好惡之流。匪石一心。曾未裨于涓壻。頓車長道。固已迫于桑榆。會丕舉于宗祈。饗更隆于褒進。觀能受祿。誠可畏于人言。審分辭盈。竊自規于天理。伏蒙皇帝陛下。旁斥浮毀。曲矜晚宦。以立朝事。主有四海之孤。以圖事。共政無萬死之惑。使趣祗于迺服。豈素望于茲時。嚇鷙還止于桐梧。樂鷄重陳于鐘鼓。自惻衰殘之至。何勝禮遇之優。始以謀王。敢道齊桓晉文之事。終之格帝。尙希伊陟臣扈之功。

謝南郊加恩表

奉二精之報。方錯事于崇邱。獵三靈之流。遂均釐于邇輔。仰承嘉命。俯惕孤衷。伏念臣早會昌期。進聞國

論器雖狹于所用。志常勇于有爲。屬修郊廟之祠。叨預公卿之議。鳴鐘在簾。獲際靈旂之娛。紆佩掃塗。親承天步之恪。曾乏秉文之助。得觀繼聖之能。逮敷錫于鴻休。復過膺于寵數。論非朝允。恩實天隆。茲蓋伏遇皇帝陛下。文輯闕希。仁漸疏迷。因神推惠。既被蟲魚之豐。爲己掠功。何勝淵谷之畏。尙勉殫于朴守。期少謝于曲成。

謝賜入伏早下表

伏蒙聖慈。差入內侍。省高班某傳宣。三司入伏早下。至末伏依舊者。伏以炎焯貫敘。適當祠伏之初。詔驛傳音。俾遂退公之佚。被寵至渥。拊躬若驚。伏念臣器粟屏微。慶逢休盛。侍帝殿之邃。乏嘉猷之屢陳。綜計廷之繁。殆經費之鮮給。然而金穀萬計。夙宵一心。方懷謫之寢深。敢圖安而自便。豈謂皇帝陛下。愛均臣體。慈發天衷。載矜歎鬱之辰。甫降深純之誨。舉漢家之令。特優出沐之期。詠周人之詩。敢敦在公之節。永肩勤瘁。上答生成。

又

伏以上伏之辰。載離于煩暑。中發之詔。有惻于庶司。日遂公休。舉銜聖寵。伏念臣早緣僭學。獲齒清時。居乏先容之階。獨誤上知之厚。晚輸心瘁。徧歷顯榮。劓京兆之煩。固政迹之無異。綜大農之計。幾心畫之會殫。然而職隆則謗所叢。材鮮則事不給。寒暑回薄。敢思退食之安。夙夜勤勞。大懼曠官之譴。豈謂皇帝陛

下、德深天地。愛浹臣鄰。軫炎籥之御時。降使貂而申命。蠲曹事之冗。俾從少間之私。竭公家之爲。終盡一心之報。

又

伏以夏籥之交。甫會三庚之熾。詔聲之發。有矜庶府之煩。退樂公休。仰銜天寵。伏念臣緣末學之進。乏先容之階。早塵賢路之游。遽竊禁林之侍。奉藩宣于外。蔑治迹之布聞。筦財利于中。幾心計之殫盡。然謗叢材薄。責起任憂。殆歲月之未功。曾夙宵之敢肆。伏蒙皇帝陛下。至人裕物。元化參天。念時之暘則及人。以恩。閱職之勞則均人。以逸。舉漢儀之舊率。遂早歸之期。因庚制之頒。更宏多暇之政。臣珪敢不靜而經事。居則圖庸。一心在公之爲。少酬自天之賜。

謝太后撫問第一表

伏蒙聖慈以臣祇奉大行太皇太后。靈駕在道。特降中使。傳宣撫問者。申飭使輅。下頒慈詔。仰銜優渥。舉集驚榮。恭以太皇太后仁孝惠和。聰明睿智。母儀后德。輔導之力居多。聖子神孫。保育之恩殆至。愴玉衣之如在。瞻龍馭之已遙。維時瑣才。方尸大事。豈謂伏蒙皇太后殿下。哀思及遠。聖慮發中。頻加惠于具臣。頓紆勤于長道。尙圖徽績。少答殊恩。

第二表

使華絡繹。睿澤便蕃。寵極自天。震深臨谷。伏念臣叨聯承弼。首預勸防。罔知行役之勞。惟盡夙宵之慮。方屬青天煒煦。黃道修除。時無寒暑之侵。衆無險易之利。舊章具講。大事行襄。豈謂伏蒙皇太后殿下。孝篤奉先。恩隆逮下。禮不以人而稍廢。事緣有素而弗僂。故沓惠于溫言。俾各祇于能務。

第三表

游屈使華。嗣膺宸諭。承命既渥。撫躬靡皇。伏念臣才匪適時。任惟承乏。屬因山之藏事。叨奉駕以啓行。下翔鳳之瑞闈。風雲爲之變色。過躍龍之閒館。道路莫不隕心。方激中哀。復推異數。此蓋皇太后殿下。念姑嫜始終之大義。有子孫付與之至恩。愴自慈襟。惻及多露。惟誓糜軀之効。上酬載物之私。

謝皇帝撫問第一表

伏蒙聖慈以臣祗奉太皇太后靈駕在道。特降中使傳宣撫問者。使軺遺至。宸綽下臨。仰體眷懷。竊深榮懼。恭以大行太皇太后功隆德盛。善積慶長。退處東朝之尊。安享三宮之養。不圖奄棄慈極。遽卽遷遊。方從車雲之行。未有夙宵之效。伏蒙皇帝陛下。堯仁多惻。舜慕逾深。詔發芝封。已建因山之號。歌流薤挽。更勤陟屺之思。載矜將命之勞。申錫徽光之渥。撫存特厚。啓處奚勝。

第二表

星軺旁午。宸綽丁寧。恩泫禮隆。感積驚至。伏念臣叨膺聖選。獲典厥儀。屬先遠之告期。集方中之祕藏。望

清洛山川之舊。聽黃麾鼓吹之音。瞻慕無窮。哀號曷處。豈謂伏蒙皇帝陛下。有懷在外。馳詔目中。發明孝思。既惻星霜之變。嗣傳使指。又矜霧露之勞。終自勉于寸愚。庶靡墮于朝命。

第三表

洊發星輅。曲頒宸指。寵加典外。愧浹情涯。伏念臣偶緣聖知。擢寘宰輔。泣讀上賓之誥。襲冠典喪之行。望極霸陵。不改山川之舊。悲深慶壽。更無歌舞之餘。顧大事之甫襄。敢羣志之弗勉。豈謂皇帝陛下。情隆送往。恩眷庀司。帝所深嚴。時發鈞天之想。王言溫厚。更增陽谷之和。雖內盡于單忠。曷仰酬于洪造。

謝賜生日表

伏以過被溫函。特推異數。省躬無似。據寵爲憂。伏念臣生雖逢辰。學不貫道。空玷累朝之遇。徧躋近禁之聯。屬神睿之嗣隆。勞旰宵而求治。曾乏涓塵之益。以培日月之華。遽進被于制綸。使預聞于國論。且短材難給。殆爲空位之人。而舊物不遺。曲記賤生之日。出賜常于內府。起殊觀于私庭。此蓋皇帝陛下。仁養衆賢。禮優近輔。何意衰齡之幸。更叨嘉錫之榮。誓永竭于孤忠。庶少酬於鴻施。

又

使馭趣臨。俯闕于天檢。私庭獲耀。有駭于羣觀。居靡自安。思無以稱。伏念臣學雖望道。器不逮人。徒遵會于文明。偶歷班于華近。顧以孤忠之守。荷于累聖之知。方上德之日躋。擢羣豪而時乂。過收舊物。俾貳台

司聖略幾神。曾乏涓塵之助。素煒還律。特旌犬馬之生。此蓋伏遇皇帝陛下。推君道之勤。篤臣鄰之愛。曲將異數。施及微才。茵鼎恩深。誤被養賢之制。桑榆景薄。益堅報國之圖。

又

詔使傳音。遽闕于溫檢。上臺將賜。特厚于彝儀。揣分過倫。拊衷盈愧。伏念臣志雖嚮古。才匪濟時。徒被顧于三朝。偶預裨于大政。懷鉛抱槧。學本出于書生。澤國芘民。術固慙于王佐。候貫初商之序。寵旌載育之辰。論效何施。鑿榮尤異。此蓋伏遇皇帝陛下。仁均天覆。美篤臣鄰。舊物不遺。以極遇賢之禮。孤忠自守。益深報國之圖。

又

賜出上臺。光生私室。恩加典外。愧溢情涯。伏念臣本絳孤。羈進值休盛。得並峻賢之軌。偶塵要近之班。合慮必精。雖勉百爲之務。揆元經體。莫裨萬化之成。敢謂皇帝陛下。濬發清衷。曲存舊物。均以弼疑之序。旌其生育之辰。飭使御以來臨。被詔函而申獎。禮將物腆。祇貽竊位之譏。恩大報微。空負蓋高之德。

又

詔使甫臨。遽頒于天語。賜儀特厚。增耀于家庭。竊伏再思。愧無以處。伏念臣學雖稽古。用不適時。蚤辱三朝之知。徧更二禁之直。孤忠自信。寸效莫施。荷睿眷之過憐。進台司而預政。覩顏素食。候驚五稔之移。竭

慮殫忠莫省一毫之補。時涉初秋之序。寵旌始育之辰。此蓋皇帝陛下。推賜予之蕃。嚴禮貌之遇。奚是瑣涼之質。亦膺恩意之隆。禮重褒賢。不遺于舊物。忠期報主。願守乎素心。

又

申命使鑣。肅將帝檢。特推異數。施及無庸。據寵爲憂。撫躬增愧。伏念臣才無異衆。幸有逢辰。登累朝儒翰之班。乏一言左右之助。逮聖神之建統。攬豪俊以乂民。曾舊物之不遺。繇近局而召用。終鮮謀猷之獻。空施夙夜之勞。拙直一爲。咎讒衆至。被涵容之曲甚。衰慙晚之未酬。豈謂尙記始生。過饗殊遇。旣錫之牢醕。又從以粟粢。賜出上臺。榮生私室。此蓋伏遇皇帝陛下。厚遇賢之體。嚴置輔之儀。蓋禮本養賢。昭發君仁之厚。而義形報上。敢忘臣道之勤。

又

秋煒還律。方懷生育之慈。使傳臨門。遽被便蕃之賜。寵加曲外。愧溢情涯。伏念臣偶以諸生。進逢昌會。歷朝班之通顯。參國論之幾微。寢誤倚求。擢居丞弼。恩隆効薄。位愈進而愈驚。任重責深。勢彌危而彌懼。況大明之溥照。攬羣俊以翼成。起修百度之新。協應九功之序。袞衣何闕。曾無小補之施。台鼎未調。更竊大烹之享。此蓋伏遇皇帝陛下。隆馭邦之策。嚴置輔之儀。記皇念于始生。將賜儀之旣渥。觀雲需之象。實豐飲食之頒。歌天保之章。惟上岡陵之報。

又

恩記乃生。禮優諸輔。陳上臺之多。賜動單族之殊。觀惕然汗顏。僕以承命。伏念臣偶緣孤學。寢誤聖知。嘗參國論之餘。遂正台司之陟。方真人有爲之際。蓋不世難遇之時。仰皇德之日躋。歎淺能之坐斲。位隆三事。已積空官之尤。祿享萬鍾。更虞浮食之誚。不圖異數。忽及茲辰。此蓋伏遇皇帝陛下。廣渥惠以賦賢。推孝心而逮下。特表柄臣之遇。奚勝私室之榮。祿不逮于養親。空懷永世之慕。忠可移于事上。何惜一身之捐。

又

詔函甫暨。臺饋申頒。絕衡弼之異恩。動里閭之殊觀。伏念臣所懷蹇淺。自奮羈單。方少而孤。每感劬勞之日。其生也幸。得遭熙盛之朝。遂以區區投老之身。而處赫赫具瞻之地。預圖邦政。固無經遠之謀。式燕私門。更誤養賢之禮。此蓋伏遇皇帝陛下。寵綏近辟。丕冒庶工。謂君臣同體。則憂樂宜均。而上下相求。則報施爲重。幣繒實篚。寵已厚于解衣。餼廩盈庭。愧有加于浮食。敢不內竭朴愚之守。上酬獎顧之深。

又

誤奉明恩。曲頒異數。禮雖有舊。分實踰涯。伏念臣以羈單孤陋之資。值希闊盛明之運。親蒙聖拔。遂翼政機。以道事君。有一心之死節。非材當國。幾衆毀之捐身。方位重而憂深。更寵加而禮至。此蓋伏遇皇帝陛

下舜孝誕敷堯仁丕冒。記犬馬始生之日。知有感于劬勞。推君臣同體之心。欲俯均于憂樂。盤孟鏤器。綺組織文。將此實篚之衣。申以在垆之駟。乾坤大施。顧享之以不貲。螻蟻微軀。愧缺然而未報。誓益殫于孤樸。期少稱于甌明。

又

使華泊館。臺饋盈庭。被聖造之異頒。出朝彝之絕儼。伏念臣生而踦蹇。學至陋迂。徒際昌時。遂塵重任。時髦並進。方懷竊位之虞。家食已豐。更厚養賢之禮。顧積勤之何取。祇冒寵以加慚。此蓋伏遇皇帝陛下。物徧德容。時均澤及。念邦政之大。而不忘舊人之共。屈帝辰之尊。而特齒孤臣之生。老且思親。靡及奉牲之養。忠而事上。惟堅填壑之圖。

又

素籥環陰。溫言發詔。禮雖存于舊典。寵實冒于等彝。伏念臣本起諸生。誤尸宰事。有飭躬之一節。無經國之大猷。顧位重而多虞。每恩深而自愧。敢意始生之序。游饗異數之臨。綺組光華。盤孟雕錯。念殘骸之未泯。旣頒御府之衣。念駑駕之不前。更錫天閑之駟。周旋被惠。踧踏無容。茲蓋伏遇皇帝陛下。廣天覆之仁。篤臣鄰之愛。靡問職勞之薄。有加賜式之蕃。祿不逮親。追極桑弧之感。心惟許國。誓殫犬馬之勤。

又

使璫傳命。賜籩生華。奉跪踰倫。溢情知愧。伏念臣誤蒙聖獎。登備宰司。舉無軼于衆材。居莫勝于大務。驚炎涼之寢易。加筋骨之向疲。進無以贊非常之功。退不敢懷自安之計。未離曠斥。實賴保全。何意始生之辰。更有異等之澤。此蓋伏遇皇帝陛下。推厚賢之禮。廣存舊之風。豈獨重一時之恩。亦將爲庶位之勸。過及庸陋。大蕃寵休。茵鼎承榮。顧念親之匪逮。罔陵歸福。思報上以何窮。

又

歲籥環陰。方結劬勞之感。使貂泊館。特持賜予之優。揆稱無容。循涯自愧。伏念臣謬奉神簡。叨陪政機。當難遇之盛時。專久孤之樸守。聖躋功就。既高二帝之行。器狹任隆。終鮮一塵之助。正懼空官之責。何勝異數之加。茲蓋伏遇皇帝陛下。申眷近司。惇修故事。厚其幣帛。得盡鹿鳴之誠。壽如罔陵。敢忘天保之報。

又

寵光下濟。餼廩申頒。荷聖造之生成。優輔臣而飫賜。伏念臣生而孤蹇。少也賤微。獲際昌期。久塵重任。鼎司濫處。方懷覆餗之憂。家食已豐。更玷養賢之禮。此蓋伏遇皇帝陛下。堯仁溥及。湯德兼容。道並乾坤。澤均雨露。記犬馬始生之日。品雖下而不遺。推君臣同體之心。感至深而難報。幣繒充篚。饗饋盈庭。戴厚意以戰兢。省素餐而勉勵。腥必熟而薦獻。恩罔極于劬勞。惟堅移孝之誠。庶有顯親之效。仰酬洪覆。敢惜餘生。

又

詔函俯及。禮數優加。受寵若驚。冒榮爲懼。伏念臣遭逢盛旦。寢服近司。雖愚樸之內殫。在經綸而何補。敢圖生日。併辱殊恩。綺組光華。盤盂雕錯。筓衣出賜。衰微不稱于身章。廐乘分頒。勉強自慚于駑力。斯蓋伏遇皇帝陛下。大明均照。圓蓋推仁。不以具臣。略其舊典。方劬勞之未報。加錫賚以逾涯。祿不逮親。念桑弧而增感。心惟許國。異芻狗之無知。仰答洪慈。誓堅素節。

又

溫厚溢言。便蕃加式。屈王人而臨諭。耀私室以增榮。伏念臣蚤誤時恩。久襄宰事。奉令承教。敢違終食之間。經體贊元。未効秋毫之末。每退循于蹇淺。恐終累于休明。豈謂於寬申。加寵賚。叨榮雖異。揣稱奚聞。且致養之勤。悲莫深于弗洎。而揚名之美。忠自信于能移。誓竭電電之思。少致拳拳之義。

又

寵私未愆。蕃錫有加。徒知拜貺之榮。孰識論酬之所。伏念臣少承緒業。初乏遠猷。會逢聖運之開。登備宰司之曠。已侵尋于歲月。無補報于涓埃。况在循名責實之時。尤難當軸處中之任。乃瘞厥位。以忝所生。寬慈未卽于明誅。寵獎更叨于異數。想象桑弧之設。指景難追。咨嗟蕭露之濃。捫心獨感。此蓋伏遇皇帝陛下。以大明旁燭。以盛德兼容。謂操柄以馭臣。宜致誠而加禮。意有鹿鳴之厚。敢不盡心。美同天保之歸。庶

能報上。

又

王人甫暨帝賚有加。品物在庭。恩光動室。伏念臣持孤愚之守。偶盛大之期。顧當蒲柳之衰年。尙竊機衡之重任。曾無裨補。猶冒休華。寶詔發函。曲記載生之日。大官第式。更陳多錫之儀。僂以自思。藐無足稱。斯蓋伏遇皇帝陛下。懋優賢之寵。衍推食之慈。黨舊典之按行。蓋宸心之過軫。蕭然白首。豈忘負米之貧。歛爾餘陰。敢後捐軀之報。

又

曲膺天獎。游降詔文。拜賜之優。以榮爲懼。伏念臣寢絲孤學。詔冠近司。空殫歲月之勞。曾鮮毫釐之補。久願還于重柄。庶少厭于浮言。仰識矜憐。未行能免。載臨流火之序。猶念射蓬之辰。珍幣盈庭。加錫衣于賜篋。寶鑣照路。下駿足于天垆。敢以無能。頻然當此。茲蓋伏遇皇帝陛下。仁侔乾施。體厚臣鄰。禮以養賢爲先。事不因入而廢。願茲寵異。屬在衰遲。志欲養親。靡及南陔之戒。忠于報上。願輸天保之勤。

又

敕使踵門。曲諭褒言之緝。大官庇物。載申異禮之蕃。荷寵過庸。臨淵加懼。伏念臣蚤躬樸學。寢歷近班。濫持守于鈞衡。謾侵尋于歲月。贊元經體。實負素餐。當軸處中。有孤羣望。適九秋之肇序。方六射之甫期。猥

加臺餽之儀。特畀天廚之品。餼牽豐碩。蓋使識自養之榮。醪酒旨清。又將蒙既醉之福。惟是深仁之難報。曾何飫賜之足勝。此蓋伏遇皇帝陛下。體貌嚴于輔臣。匪頒厚于拜式。隆漢家推食之惠。增周雅錫朋之休。生有至恩。不及承顏之養。晚圖一節。惟堅事國之忠。

又

聖言如綽。有溫厚于芝函。拜賜自天。發光華于蔀室。榮躅素望。媿溢常涯。伏念臣以固陋之資。被睿神之眷。迺預塵于政路。復冠列于台司。歲月嶢嶢。而屢更精力。勤勞而莫補。速譏讒于衆口。媿功烈于前人。逮茲苟完。安有橫翼。載及桑蓬之序。方深帖屺之思。念莫報于劬勞。敢襲承于恩禮。良金燭乘。嚴寶勒于天駒。藻帛絢文。雜華章于笏服。豈繫蕃庶。併及衰遲。此蓋伏遇皇帝陛下。敦舜孝以儀民。軫堯仁而冒物。特厚柄臣之遇。過頒御府之珍。交孚曲記于賤生。博愛乃容于濫賜。漢庭拜寵。雖慙稽古之工。周雅有章。願上如岡之壽。

笏記

謝宜召赴集英殿乾元節御宴笏記

伏以鳴社膺期。值南訛之司籥。需雲錫宴。崇萬壽以稱觴。恭惟皇帝陛下。躬上聖之姿。紹中天之命。德符炎歷。早開大電之祥。歡浹朱鄰。普慶南山之祝。矧預秉鈞之冠。更榮在鎬之逢。舉樂皇恩。永肩孤瘁。

謝賜生日禮物笏記

伏蒙聖慈。特差臣男祕書著作佐郎充崇文院校書某押賜臣某生日禮物者。茂膺睿眷。擢預台司。載履始生之辰。曲被至優之賜。誓堅忠節。期報鴻恩。

謝賜年節御宴笏記

伏蒙宸慈。特降中使賜臣某等年節御宴者。伏以春元更煦。君燕示慈。樂及喜辰。榮深近輔。茲蓋皇帝陛下。仁均天施。禮厚臣鄰。適臨獻歲之和。特啓需雲之會。誓肩一節。申答殊私。

又

伏以氣更年籥。燕示天慈。歡屬盛期。寵申近輔。茲蓋皇帝陛下。義深同體。德廣爲春。特加折俎之儀。使預登臺之樂。仰銜厚遇。永厲丹衷。

謝宣召赴紫宸殿御宴笏記

伏以燕示帝慈。歡修鄰好。拱宸旒而在望。浹朝禮以知榮。恭惟皇帝陛下。仁浸物生。功參天令。一元施統。適更鳴律之酥。萬玉來庭。特侈需雲之會。臣等親逢盛際。冒服近班。仰涵君賜之深。永厲臣愚之報。

謝宣召赴集英殿春宴笏記

伏以春籥敷和。載歌羣物之楸。帝庭命享。遂合諸臣之歡。恭惟皇帝陛下。德與古躋。事因時講。備樂所以

昭禮。加鼎所以示慈。臣等參列台司。首塵君召。徒樂宴私之飫。莫知涓露之酬。

中書謝春宴笏記

伏以春物喜華。宸居暇豫。中開宴賜。下逮臣工。伏惟皇帝陛下。盛德對時。至仁自性。弗爲獨樂。務與衆均。臣等備位在廷。逢辰多慶。略無報稱。第有戰兢。

謝賜上巳瓊林苑御宴笏記

伏以禊屬芳辰。燕班別簾。飲盛華林之集。歌同沂水之行。臣等參柄近司。預榮勝會。黨盡臣忠之瘁。匪曠君賜之隆。

謝參知政事笏記

伏奉制命。特受臣參知政事。祇奉渙恩。伏深兢素。伏念臣早以末學。遷于盛期。進領代言之司。已妨賢路。參謀論道之府。何補聖猷。茲蓋伏遇皇帝陛下。求士不厭其勤。用人不責其備。致未捐于舊物。且特置于近僚。敢不上體至懷。正堅孤守。益廣衆功之美。少酬鴻施之私。

賀皇子延安郡王侍宴笏記

元豐七年三月

適得閣門告報延安郡王。今日出侍大宴者。伏以玉宸侍宴。帝子承顏。上慰聖神之情。大爲邦國之慶。

華陽集卷十三

內制

嘉祐明堂赦文

朕承三聖之基。履四海之貴。深維持國之日久。益念爲君之道。藉有臨聽之廬。庶以圖天下之逸。無奉養之靡。庶以資天下之豐。兢兢萬務之惟微。勉勉前事之所戒。倚以左右輔弼之正。予敢有弗欽事于上下神祇之明。予敢有弗肅屬九穀登富。三辰昭華。象來桂海之祥。塵絕玉關之警。有邦之應。于朕豈功。恭念爲天之子者。必修報本之禮。爲人之子者。必懷追養之慕。重循菲德。屢緝曠文。頃按明堂之圖。有如路寢之制。載經斯室。載度斯筵。值大火之駢芒。乘季秋之肅氣。物無上帝之稱。非躬祠不足昭乎虔。聖惟文考之尊。非嚴配不足盡乎孝。于時備法物之駕。服大冕之章。格靈貺于真庭。款清德于太宇。還祇宗祀之舉。具飭純誠之將。乃神光陸離。燭于薦鬯之夕。喜氣休晏。被于燎柴之時。亶丕事之繼成。敢蕃釐之專鄉。宜乎廷渙。以契天心。可大赦天下。於戲。承神之胙。既均輝耀之微。盪俗之瑕。復若風霆之布。蓋禮鉅則擇之博。孝至則勸以遐。尙賴秉文之英。經武之傑。厲同寅于王室。壯大治于邦圖。共荷無疆之休。亦膺無窮之聞。

熙寧元年南郊御札

有天下者莫重上神之報。爲人子者莫嚴宗廟之承。率躬三歲之祠。常候一陽之應。緬慕先聖。光施冲人。載循禋類之期。適在諒陰之際。大懼不能備飭儀物。奉將粢盛。于是刺六經之文。傳博士之議。皆以爲喪。有以權而順變。祭無以卑而廢尊。矧稽參西漢之彝。沿用景德之制。顧予涼菲。賴帝貺臨。遂卜天正之辰。往修郊見之禮。方且進祈茂祉。以大芘黎元。昭格至精。以終圖熙事。庶幾能享其敢憚勤。朕以今年十一月十八日。有事于南郊。咨爾攸司。各揚厥職。諸道州府。不得以進奉爲名。輒行科率。其百司除事神之物。並宜一切仍舊外。餘應于供奉所須。務令澹約。以稱朕不忘孝思之義。

雨災許言時政闕失詔

蓋聞古之聖賢在位。陰陽和風雨時。日月光星辰靜。黎民阜蕃。以底休平。朕甚慕之。朕猥以眇身。託于王公之上。夙夜之思。惟懼不能以承先帝鴻業。而比年以來。水潦爲沴。八月庚寅。大雨京師。室廬墊傷。被溺者衆。大田之稼。害于有秋。竊迹災變之來。曾不虛發。豈朕之不敏于德。而不明于政歟。將天下刑獄滯冤。賦徭煩苦。民有愁嘆。無聊之聲。以干其順氣歟。不然。則何天戒之甚著也。今飭躬焦思。欲銷復大異。而未聞在位者之忠言。進祈自新。厥路何繇焉。應中外臣寮。並許上實封。言時政闕失。及當世之利病。可以佐元元者。悉心以陳。毋有所諱。執政大臣。皆朕之股肱。其協德交修。以輔朕之不逮。

賜臺諫官詔

樞密本兵之府也。在祖宗時。固嘗得勳勞親信之武臣而參用之。日者先帝用郭遠。蓋有意乎此也。今臺諫官爭言遠不宜在執政之地。朕嘗熟復于懷。以一言之譽進之。以一言之毀退之。豈朝廷篤于用人之意耶。至引德宗之點常袞。憲宗之貶韋執誼。豈不傷先帝知人之明。使朕亦踉蹌而靡安也。夫言而不闕于情。體諸朝廷之宜而易行。朕何憚而不從。毋爲徒紛紛也。其審朕言。毋忽。

立皇子詔

人道親親。王者之所先務也。蓋二帝之隆。治繇茲出。朕甚慕之。右衛大將軍。岳州團練使曙。皇兄濮安懿王子。猶朕之子也。少鞠于宮中。而聰智仁賢。見于夙成。日者選于宗子。近籍命以治宗正之事。使使者數至其第。迺崇執謙退。久不受命。朕默然有嘉焉。朕蒙先帝遺德。奉承聖業。罔敢失墜。夫立愛之道。自親者始。固可以厚天下之風。而上以嚴夫宗廟也。其以曙爲皇子。

皇子曙免恩命第二表不允詔

昔周之建國。必先同姓之盟。況予父子之愛乎。夫爵祿者。朝廷之公器也。朕旣外隆以賢。又內篤以親。而公天下。非爲私也。今命書之下。衆牘固辭。豈副予親親之意。所乞宜不允。

皇子曙免恩命第三表不允詔

朕惟先王治國之法。必由近者始。故申父子之至恩。則天下歎然以相愛也。今爾奉書者三。謂爵命之不可私。朕固嘗咨于政事之臣。未以爲過寵也。且予貴爲人上。而能不福汝乎。雖欲勉從嘉意。良不可得。所乞宜不允。

皇長子穎王頊乞班在允初下不允詔

孟軻亦云。爵爲天下之通貴。漢家之制。王乃皇子之近封。雖骨肉本無異恩。然朝廷著之定位。矧予上嗣之愛。方爾外傳之從。輒駕旣行。而馳道未窮。鳴雞適旦。而寢門已至。自進疏于方社。數推序于宗藩。當識先民之大方。以傳西京之故事。蓋位不同者禮異。名不正則事違。豈君父之獨親。亦臣子之明分。往班天秩。思懋賢猷。所乞宜不允。

皇長子穎王頊乞班在富弼允良下不允詔

夫廣封建者。所以大京師之輔。正班秩者。所以尊朝廷之儀。豈有享高爵而處後陳。不可緣私恩而撓公法。蓋親親者愛本于族。貴貴者體近于君。宜略摛章。往祇定著。所乞宜不允。

皇伯允弼皇叔允良允初特免常朝五日一赴起居詔

夫尊尊親親。人道之極也。有若伯父。保有賢德。以藩屏于王家。朕新承大統。思廣骨肉之恩。以風天下。匪尊遇之。何以見愛乎。其免常朝。每五日一赴起居。

治平立皇太子敕文

王者承天立極。莫不思長世之圖。爲國建儲。所以正萬邦之本。故朕親先父子。而天下不以爲愛。命發朝廷。而天下不以爲私。粵予上嗣之良。稟自日躋之聖。出而就傅。寢窮學肆之聞。入則承顏。勤至寢門之間。比疏榮于王社。益侈德于天枝。顧荷丕基之艱。猶虛正體之貳。矧漢文命嫡。著于卽阼之初年。且夏后立賢。期以傳家于萬世。維羣元之所後。維大器之所承。式符少海之祥。宜踐東朝之位。肆顯冊之不發。嘉僉言之大同。爰契歡心。用覃曠澤。可大赦天下。於戲。文昭武穆。夙詒燕後之謀。震長離明。本有承華之象。蓋義重乎先。則禮必亟舉。慶施乎上。則惠必遐流。咨爾庶方。當體朕意。

封太祖皇帝後詔

昔我藝祖皇帝之興。以天發之期。兵未始一血刃。而卒再造區夏。其大謀盛烈。被諸萬世。而莫高焉。朕奉承聖緒。夙夜不敢康。乃顧後之子孫。寢微不顯。而有司未嘗議封爵之文。豈朕所以遵大統推親親之意哉。且積厚者其流遠。施大者其報豐。宜令中書門下。攷太宗之籍。以屬近而行尊者一人。裂土地而王之。使常從獻于郊廟。世世勿復絕。

賜外任臣寮歷日詔

四氣更端。三朝首序。願惕承于邦統。爰恭授于人時。列土尊王。上春始事。宜膺班朔之命。益懋勸民之方。

今賜卿治平二年歷日一卷。至可領也。

又

朕順稽天紀。節授民常。推紫緯之經文。起清臺之密歷。以正昏明之度。以宜發斂之期。適及時頒。共熙邦務。今賜卿熙寧四年歷日一卷。至可領也。

賜判大名府韓琦便宜從事詔

朕比以大河之北。水患相仍。又去年地震不已。城壁室廬。葺而復隳。變執甚焉。朕憫然有封禡之虞。深思得人以鎮撫一方。卿舊政之臣。惟是國家休戚之均。故前遣使者以諭屬卿之指。庶幾莫或予違。今乃以去鄉閭。撓疾患爲辭。豈朕所望焉。且抱大忠者。固常戀于本朝。縉閥略者。誠匪安于散地。其勉精持神。易轅而之藩。毋使朕終廬于北顧也。已除卿判大名府河北路安撫使。仍聽便宜從事。苟朝廷有可應副。朕當力爲主張。今差入內東頭供奉官。勾當御藥院李舜舉。齎敕賜卿。卽宜祇受。便發赴任。以副朕意。

賜使相判大名府韓琦條畫河北利害詔

自北道休偃兵革。垂七十載。而人情恬于安佚。武備弛于因循。養兵雖多而未練。奮馬雖衆而未精。繕修城壘而未盡完固。簡閱器械而未盡犀利。加以隄防決壞。溝洫湮廢。賦斂不節。徭役無時。民力困于累年。軍儲置于列郡。此使朕不得不以邊爲憂也。夫謀不必勝。安有可恃之勢。事不素具。曷待非常之虞。卿總

制方陞。舉精策慮。在與廢而補弊。務經遠而適時。至于軍政之弛張。將吏之能否。出入之險易。守禦之利害。皆可密爲條畫以聞。

賜判大名府韓琦爲水災撫輯河北詔

大河之北。歲比不登。又有水溢地震之災。方春東作。民益不聊生。攜老幼。棄田廬。日流徙于道。朕甚閱之。豈役煩斂重。而吏莫之省耶。將姦人乘此災變而動之也。朕中夜以興。爲之慘怛不安。前日徙卿以鎮大名者。非有意于此乎。其經制之方。已聽便宜從事。若有可以佐吾民者。宜帥意遠思。爲朕撫輯而賑全之。毋使浚民以重民困也。

樞密使文彥博乞罷節度使公使錢獎諭詔

朕日裁萬幾。晨訪近輔。而卿因錄先朝之奏草。載辭舊府之公錢。乃謂在外則有犒軍師之常。在內則無享賓寮之事。願敢受于私室。願悉還于縣官。朕惟德盛者必約諸身。計遠者必體于國。故曾子輕楚人之富。何慷慨之所存。汾陽佐蕃市之財。衆謂忠之尤至。勉從嘉舉。重集褒懷。所請已依。故茲獎諭。

光祿卿知濟州楊申訓兵有法獎諭詔

兵法曰。卒不可用。以其將予敵也。朕患諸道之兵簡練之不精。乃親閱戰士于庭。而京東之兵頗知戰而有勇。然其所以簡練之法不在主吏乎。朕甚嘉之。

獎諭韓璿等詔

夫天下之役常困吾民。至使離飢寒而不能以自存。豈朕爲民父母之意哉。吾詔不勤。而察民未深也。今梓州路獨與興民之利。而去其害。欲加諸賞。朕何愛焉。觀執政之用心。于朕豈有異乎。韓璿等已降敕獎諭。仍各賜絹二百匹餘。並依所奏施行。

龍圖閣直學士知成都府趙抃治迹尤異獎諭詔

蜀遠在西南。最要郡也。朕患吏不能究宣德澤。以被于遠民。故其擇守。非慈良簡重者。不以命之。卿在蜀甫踰年。而使者以其治迹尤異。上于朝廷。夫吏所以治民也。能盡其治。而民賴之。豈不嘉汝乎。

龍圖閣直學士知審刑院盧士宗斷絕獎諭詔

夫法令者。治之具。而非制治清濁之原也。朕傷時之薄德。不足以導民。而至于用刑。故選明察之官。以審天下所上之獄。諸疑者。讞之。而歲無逮繫之淹。書不云乎。惟敬五刑。以成三德。茲亦惟予一人之有慶也。非爾孰能之。仍依奏宣付史館。

又

夫上之教化未至。而欲民日遷善而遠罪。其何由哉。今夫內置理官。以讞平天下之獄。一歲之上。繫無留文。非曰職事之舉耶。章聞予聽。嘉歎久之。

又

刑罰所以輔治也。以百姓未習于教化。朕敢弛姦之防。今爾迪于刑之中。使天下繫無所淹留。書不云乎。哲人惟刑。無疆之辭。屬于五極。咸中有慶。予惟爾嘉之。

又

朕患天下吏用法之不平。又因緣生姦。所欲活則傅生議。所欲陷則予死比。未嘗不惻然于中。故以廷尉所上獄。更命近臣其審克之。視一歲所決。而無留繫之苛。雖未能造成康之隆。然亦適于用刑之中。輔民起治。顧不汝嘉乎。

賜龍圖閣直學士知審刑院錢象先斷絕獎諭詔

蓋聞唐虞之時。畫衣冠而民不犯。朕甚慕之。今朕咨擇近臣。以審夫天下之獄。章上廷尉者。讞之輒空。雖未能做古。要之不僭用刑。其亦庶幾乎與言褒歎。不忘于懷。

又

夫立法明刑。非以爲治。蓋以禦暴慢。輔政教之所施也。朕惟人之多辟。比置羣吏。申審克之制。以參決其平。卿持法詳明。盡心乃事。具獄之上。奏讞悉空。省閱之餘。特深嘉尙。

天章閣待制權知審刑院呂公著斷絕獎諭詔

夫古之用刑。蓋所以期無刑也。朕念哀元元。離法者衆。天下所上。廷尉之獄。又命官以審之。庶幾罰當而姦少止矣。卿文學之臣。副之政事。能率其屬。蔽斷無留。嘉歎之懷。曷維其已。仍依奏付史館。

天章閣待制知審刑院孫固斷絕獎諭詔

夫刑者。本以助治也。民之嘷嘷。不能無過差。而入于刑。非決其所滯。剖其所疑。則刑將殘民。而不可勝。尙何治之足助乎。卿雅以儒學進。而典天下之刑讞。而當情無留獄。良有以應予欽恤之意也。其于嘉美。終日以之。仍依奏宣付史館。

翰林學士馮京以下進南郊慶成詩獎諭詔

乃者大旅于帝。而百神祇歡。靡不右饗。非秉德之彥。夙夜在祀之助乎。及茲禮成。又能發爲聲詩。以揚一時之休。願非甚盛德。何足以稱之。省披之餘。嘉歎何已。

判許州張昇進南郊慶成詩獎諭詔

朕乃者飭精于郊。以見上帝。秉德在位。有來羣臣。眷言舊政之良。適寄近符之守。迹雖留滯。莫陪盛禮之趨。義切揄揚。遂啓永歌之作。載惟忠至。尤極褒稱。

翰林學士賈黯進宴羣玉殿詩獎諭詔

三聖之文。祕在延閣。朕乘德政之豫。詔近臣以觀之。且陳鐘鼓豆觴之盛。以娛乎太平。卿預游詞禁。材思

丰華奏篇之來。絕于羣唱。省披者再。式歎式嘉。

樞密院直學士知鄧州王琪進和後院賞花釣魚詩獎諭詔

朕萬幾之豫。思燕羣臣。暮春之和。遂啓祕苑。臨清流而發詠。惜餘尊以命觴。人心樂胥。天日延煦。雖未足掩魚藻之盛。而固已追柏臺之娛。卿蔚爲邦英。滯于郡守。聞華景之勝集。念清徽之素遊。遠託嘉詞。進廣新唱。矧儒林之碩望。有詩筆之舊名。玩味之餘。嘉歎何已。

仁宗遺詔

朕祇承大統。夙夜孜孜。常懼匪涼。不足以承祖宗之鴻烈。然兵民休靖。底于丕平。顧朕何德以堪之。乃自春以來。積勤爽豫。今至大漸。恐不得負辰以見羣臣。皇子曙。以天地之愛。朝夕寢門。未始少懈。況聰智明睿。朕素有承嗣之託。夫豈不順天人之望哉。可于柩前卽皇帝位。皇后以坤儀之尊。左右朕躬。慈仁端順。聞于天下。宜尊皇后爲皇太后。一應諸軍賞給。並取嗣君處分。喪服以日易月。山陵制度。務從儉約。在外羣臣。止于本處舉哀。不得擅離治所。成服三日而除。一應緣邊州鎮。皆以金革從事。不用舉哀。於戲。死生之際。惟聖賢爲能達其歸。矧天之寶命不墜。于我有邦。更賴文武列辟。輔其不逮。朕何慊焉。主者施行。

皇太后付中書門下還政書

日者。昊天不弔。先帝上賓。遽揚末命之言。方結未亡之痛。而皇帝踐阼之始。銜哀過情。忽傳詔于外廷。請

預聞于庶政。載念承邦之重。累申還辟之文。皇衷未回。羣聽猶鬱。願人子之誠雖至。而國家之事靡安。況日聽治朝。躬發神明之斷。出馳禁趨。衆聞輿馬之音。百姓莫不交欣三靈。以之薦祖。吾嘗視前史之戒。思系聖之圖。將退飭于母儀。庸進彊于君德。從容房闈。不亦美歟。昨權同聽政事。候皇帝康復。日如舊。去歲曾兩降手書。還政輔臣等。並於皇帝御前納下。今來聖躬已安好。其軍國事更不同處分。故茲示諭。宜體至懷。

慈聖光獻太皇太后遺詔

吾受兩朝之託。翊嗣聖之興。十有七年。安處房闈。皇帝天篤仁孝。日滋睿神。嘗咨務于禁中。獲助勤于天下。而炎涼變序。疾疹乘衰。皇帝夜不解衣。朝至忘食。雖聖心之備盡。終天數之莫踰。吾嘗觀性命之原。達死生之際。生而饗慶壽之養。沒則從昭陵之遊。願循初終。天復何恨。皇帝宜念宗廟之重。無過哀傷。更賴股肱之臣。共爲寬釋。成服之後三日。外聽政服紀。以日易月。在京文武百官十三日而除。諸司長官及近臣。觀察使以上。臨于宮庭。其餘臨于宮門外。諸道州府長吏以下三日釋服。軍民不用縞素。緣邊不得舉哀。釋服之後。勿禁作樂。園陵制度。務遵儉省。勉從吾志。勿事煩勞。並依昭憲明德皇太后故事施行。

華陽集卷十四

內制

賜皇伯祖承顯加食邑詔

朕惇宗盛禮。祗通先猷。茂對三靈。駿奔億醜。臣工顯相。后帝居歆。嘉與親賢。共膺戩穀。皇伯祖昭化軍節度使持節金州諸軍事。金州刺史兼御史大夫上柱國康國公食邑五千八百戶。食實封一千八百戶。承顯治躬齋栗。養志粹和。挺宗室之令儀。藹公侯之淑問。地隆磐石。任重藩垣。春秋寔高。學問不倦。被服儒素。蘊河間之雅材。琢磨箴規。蹈衛武之美德。助我茲祀。協于多儀。是用進功伐之名。益倍敦土田之賦。乃加眞食。并示徽恩。於戲。懷德維寧。昔王之明訓。爲善最樂。前哲之嘉猷。勉思高滿之危。勿忘臨履之戒。

賜皇伯東平郡王判大宗正司允弼免行事允詔

國家卜天正之吉。修郊見之儀。將命親賢之臣。肆陪裸薦之事。粵予伯父。以老自辭。朕顧于骨肉之恩。尙恐弗至。維是夙夜之祀。豈不爲勞。宜遂便安。以稱尊禮。所乞宜允。

賜皇伯集慶軍節度使同中書門下平章事宗諤乞罷赴中書禮上允詔

自昔公卿大夫。各率其屬。以聽于有司。國朝宗室之制。雖位公卿而不領以事。然受命之日。猶一至府。以

班見百僚。維我伯父。既位公相矣。乃不敢以故事自處之。夫德尊而不忘其禮。寵至而愈下其心。朕雖拒之可乎。宜依所乞。

賜淮康軍節度使知曹州張茂實加恩告敕詔

朕以季秋之良。薦至精于上帝。又以萬國之歡心。以事于我文考。神明感通。物有匪召而至者。蓋叢厥祥。朕既舉大澤。以被于溥天之下。矧于虎臣。嘗有夙夜之勞乎。往承其休。以敷我告廷之命。

賜使相知相州宋庠加恩誥詔

夫祭有大澤。則惠必及下。惠均則政行矣。維君子之能祭也。朕禮成明堂。福不敢專。思與一二舊政之臣。以共享之。乃己未大昕。告于外庭。蓋所以迹靈況之來。錄德褒功。賞不可稽。雖爾身在外。乃心罔不在王室。其往欽哉。以對越上帝之寵。

賜樞密使富弼赴闕詔

卿材德之粹。名世而生。昔在先朝。實登上宰。銜憂去位。日月既除。未予沖人。嗣膺大歷。聿懷元老。共濟厥圖。還冠樞臣。左右同體。

賜樞密使富弼乞假將治允詔

卿履上樞之位。制萬里之衝。謀經旭卉而合大和。命出幾微而濟大務。比爽晦明之裕。寢還體力之強。予

心未孚。其請不已。且天道之遠。豈術數之能窮。而賢德之充。自神明之來相。茂凝精粹。欽遲儀刑。宜依所乞。予假將治。

賜起復宰相富弼赴闕詔

夫宰相者。所以與朕調豫陰陽。鎮撫四夷。顧天下之務。日無不聽者。觀漢唐之際。最爲盛平。然秉政之臣。未有致位終喪之事。矧今勞思巖廊之上。而圖治之不給哉。卿遭艱以來。乃疊詔未起。朕維篤君臣者。莫大乎義。則可以斷恩。顯父母者。必揚其名。則可以稱孝。卿其抑餘哀。迪大節。以終惠子無窮之休。所乞宜不允。依累降詔書。乘遞馬疾速發來赴闕。

賜樞密使文彥博赴闕詔

宥密之府。總樞機之萬微。輔弼之臣。合股肱之一體。適圖庸于碩望。佇進翼于丕謀。宜遂過歸。式欽厚遇。賜成德軍節度使同中書門下平章事判河南府文彥博赴闕朝見後赴任詔

卿以咸德之良。有同體之愛。自遭家之大故。已去位之三年。既從日月之除。可復朝廷之事。雖仍外寄。且佇來朝。

賜守司徒兼侍中判相州韓琦赴闕朝見後赴任詔

卿曩避政機。往綏邊瑣。游攬奏函之蔭。願紆卿紱之歸。已徇素懷。且優碩輔。與念勳勞之舊。靡勝閒燕之

私可赴闕朝見訖之任。

賜宣徽南院使判太原府歐陽修免恩命允詔

朕比顧太原之道實當二衝擇廊廟之舊臣委邊防之大計而繼陳悃愾重託衰遲雖加勸諭之勤莫奪誠辭之守宜聽安于便地庶增適于高懷予于老成惟恐不至特依所乞仍仰繳納宣徽使敕就差知蔡州。

賜樞密副使歐陽修免恩命允詔

朕曩疇雋望入贊宏文帷幄之言每進規于不逮尊俎之畫或折難于未形會參政本之司進服地官之序亟露衷于宸几願回渥于制函蓋君子圖德業之隆惟賢者戒寵祿之至雖爾躬之攸勉復羣論之咸休庸遂乃誠往安厥位所讓宜允。

賜河陽三城節度使兼侍中曾公亮乞免冊禮允詔

天子臨軒拜三公其禮舊矣今朕以上公之秩加于元臣方戒有司卜日而冊授之乃援疾固辭不能爲朕引絀廷下吁其禮何時而可復耶雖用勉從則匪朕心之懌。

賜參知政事孫抃趙槩免恩命允詔

朕設爵賦祿所以待天下材賢魁壘之士矧秉國政事之臣豈復積日彙久而議遷也今二府更進例有

增秩之寵。乃露言予聞。至于懇激。夫在上位者。知所以難進。因可以下厲士大夫之風。朕何拒焉。往綏厥服。以永享其休名。所乞宜允。

賜前樞密副使吳奎辭特支請俸允詔

卿蠲離家難。遽去朝位。苴麻之飾。靡奪至情。祿稍之頒。未爲異數。露言何確。援比是辭。旣嘉孝慕之終。敢累廉規之守。所乞宜允。

賜武康軍節度使知相州李端愿赴闕詔

卿參華成苑。奉寄侯藩。載惟問俗之勞。得無存闕之念。宜往傳于迅召。佇還對于嘉謀。屬在瞻懷。尤深馳想。

賜使相判鄆州曹偁赴闕詔

卿承累世之貴。出外家之賢。自奉寄于藩符。且游更于歲筦。長樂之愛。豈無弟兄之懷。況元舅之歸。是亦文武之憲。宜膺迅召。式矜嘉猷。

賜皇后曹氏答詔

皇祐二年

朕以季秋之良。大饗于帝筮。鏞純繹。璧玉華光。肆禮禮以迄成。緊坤儀之參助。遽披嘉牘。申布慶辭。載咏謙兢。良深褒嘆。

賜皇后高氏答詔

治平二年

朕以長至之序。大旅于郊。至音繹和。精志孚盡。肆上儀之丕就。緊內治之素勤。清蹕初還。慶函首及。載循謙豫。良集嘆稱。

賜皇后向氏答詔

熙寧元年

比迪先彜。有嚴大報。乘初陽而錯事。斬羣福以裕民。迨終嘉薦之虔。適攬慶辭之美。載循柔則。長集褻懷。

賜楚國大長公主等詔

朕躬卽崇邱。祇見上帝。乘一陽之華物。飭百執以錯儀。適涓釐事之成。遽有慶函之上。申玩嘉意。良深嘆懷。

賜沂國公主等答詔

毓粹仙源。鍾慈皇室。屬帝禋之具舉。甫神貺之下凝。彩衛初回。芳函忽飭。柔心昭美。終食興褻。

賜越國長公主等答詔

德茂穠華。榮均寶系。屬熙成于郊旅。甫丕集于神祺。口返齋園。遽馳慶牘。載循惠意。徒極褻懷。

賜婕妤俞氏等答詔

早以柔嫔。班于禁殿。屬成宗祀之儀。具錫溥臨之福。適回清蹕。遽遣慶章。載體祇勤。豈忘褻尙。

賜貴妃沈氏答詔

朕躬臨泰時。祇薦嘉牲。仰格上靈之歡。還孚萬有之澤。瞻三朝之舊德。乘大呂之嘉辰。敘慶騰章。興褻起席。

賜婉容周氏免恩命不允詔

朕飭朝廷之化。慎帷房之選。進登九御之列。參播後宮之範。維爾有儀以淑。有德以恭。方內治之旌賢。乃桑章而避寵。彤音維美。紫渙難留。所乞宜不允。

賜美人董氏免恩命不允詔

朕卽教化之原。蓋治由近起。推統紀之重。則寵廢內崇。維爾法度有嫻。言容靖順。早預漢庭之選。嗣開沁水之祥。況居念憂勤。進無私誠。宜升華于服位。且旌淑于宮房。望自衆嘉。恩非獨侈。何懷謙之厚。竟抗牘以辭。方彤管之承宸。已紫書之下省。往儀爾列。毋悌予聞。所乞宜不允。

賜美人董氏免恩命迴授與父安允詔

夫事君辭寵者。德之嘉。報親崇養者。孝之至。矧本處房闈。來儀掖庭。屬辭慶于穠華。因進階于顯綴。遽騰累牘。深露柔衷。願均迺父之恩。共美茲辰之遇。實嬪闈之休範。將史管之良書。載省退沖。亦用嗟允。

賜宗室從信新婦并文安郡主等茶藥詔

哀奉仙輜。肅安眞域。方冒凝寒之候。載馳迴陸之勞。申念丹誠。亡殞渥命。

賜大內永嘉郡夫人朱氏等茶藥詔

宮車晚出。仙寢俄成。悲侍輩于昔游。結望陵之終恨。爰將嘉惠。聊慰歸途。

賜德妃苗氏等茶藥詔

夙侍神駕。甫安壽陵。望丹蹕以長遠。奉玉衣而永戀。寒威貫序。愛景馳空。均賜御奩。慰勤郊路。

賜西京汝州祔葬皇親等茶藥詔

同軌赴辰。宗喪畢舉。先原從卜。孝慕何窮。顧寒日于喬林。冒重氛於征陸。爰將嘉賜。俾輔至和。

賜從靈駕皇親東平郡王允弼等茶藥詔

護神駕之游。宅鼎郊之兆。執龍輜之素紼。從玉帳之容衣。沈露起於山河。寒暉薄于原下。有懷哀瘁。爰致

恩頒。

賜山陵使宰臣韓琦茶藥詔

神輿卽路。總使先期。陵土復宮。庀司終事。泣橋山之冠劍。犯畢陌之埃塵。宜被寵頒。用資和齋。

賜山陵禮儀使范鎮等茶藥詔

扈靈輜之舉。宅神阜之安。馳驅郊甸之勞。偃薄風霜之厲。特推珍賜。以輔沖綏。

賜山陵行事官屯田郎中郎潔等茶藥詔

祇護靈輿。肇新神域。眷夙宵之勤事。均霜露之感懷。宜有寵頒。以綏沖履。

賜山陵管勾內臣尹日宣等茶藥詔

往奉陵園。載勤夙夜。顧協經于襄事。宜均被于賜常。

賜奉安仁宗英宗御容禮儀使宰臣曾公亮茶藥詔

卽中洛之區。安兩朝之像。穀林朝望。旣驚王氣之長。羽衛天回。更想宸遊之在。顧上儀之肆舉。佇不日之來還。適屬煩歎。宜資輔嗇。

賜保平軍節度使兼侍中判大名府賈昌朝赴闕茶藥詔

外易帥垣。入趨召節。適次神畿之近。正離伏暑之煩。飭使驛之兼途。致上奩之珍錫。式推異禮。以輔至和。

賜判許州賈昌朝過闕朝見茶藥詔

易符便鎮。駐節近郊。眷行李之攸勤。屬寒暄之未適。宜推邦錫。以導時休。

賜保平軍節度使判郟州曹佾赴闕茶藥詔

爰趨召節。將次神畿。維大旆之遵塗。方高秋之凝候。宜推珍錫。以輔沖綏。

賜安武軍節度使宣徽南院使程戡赴闕茶藥詔

內均政倚外撫邊衝。適擁節以遄歸。正涉春之餘凜。載念長途之驚。豈無彌日之勞。宜被寵頒。用資珍輔。

賜宣徽南院使判延州郭達赴闕茶藥詔

特守方隅。貿淹時序。屬羌人之背惠。顧王旅之多屯。未清玉塞之氛。聊問金城之略。適祇迅召。爰及殊頒。

賜侍衛親軍步軍副都指揮使郝質赴闕茶藥詔

護塞夙勤。提兵入衛。初奉詔函之峻。載嚴軍旆之驅。爰飭使璫。往頒恩劑。

賜侍衛親軍副都指揮使馬懷德赴闕茶藥詔

比持帥節。外遏邊衝。還司禁旅之屯。甫近神畿之舍。特頒珍錫。以寵素勤。

賜陝西宣撫使韓絳湯藥詔

敵視興祚。重我邊陲之擾。戎車飭駕。蒙于霜露之勞。維經制之有方。固旋歸之匪日。特頒靈劑。用輔冲襟。

華陽集卷十五

內制

賜韓絳御寒衣服詔

比將使指出護邊虞。屬歲景之嚮窮。冒關程之正逸。埃塵薄于四野。雨雪犯于重裘。適懷征鞅之勤。特解御衣之賜。寵知加厚。報欲圖深。

賜前兩府大臣兩省以上知州初冬衣襖詔

申霜應辰。列鎮分守。特命乘輅之使。爰將賜服之儀。茂宜素勞。庸荷嘉寵。

又

早被朝掄。洊均藩寄。適戒隕霜之候。特頒在筭之衣。無忘服休。其勉恭事。

又

德懋邦輝。任勞藩劇。方屬迎寒之候。宜遵賜服之常。式厚眷恩。用均安燠。

又

去國馳思。臨藩勞慮。洊履嚴凝之氣。首均安吉之衣。聊卒歲陰。用遵邦式。

又

流景凋歲。寒風動辰。眷擁節于帥垣。特頒衣于御府。維其安煖。茲謂寵私。

敕諸路節度并逐路總管以下遺留衣物詔

朕疾大漸。惟幾恐不獲寤興。今有遺惠。以頒諸在外臣。爾其懋乃心于王家。或亦慰朕之有知也。

賜樞密副使包拯生日禮物詔

抱峻清之節。濟沈遠之謀。眷秉軸于宏廷。省夢熊之嘉月。方寵政塗之望。特將私館之頒。續爾壽祺。昭予禮遇。

賜樞密副使孫抃生日禮物詔

雅蘊賢謀。進陪機論。履肅霜之素序。記射矢之初辰。宜有寵頒。以迎壽祉。益懷忠藎。庸副眷毗。

賜樞密副使呂公弼生日禮物詔

慶發高閔。挺生碩輔。氣秉朱亥之貴。謀合丞疑之良。顧惟近司。厥有頒式。庶助祥于穀旦。益經治于冒期。

又

命發紫樞。方倚勝謀之助。寒生玉筵。環臨誕序之祥。願二府之峻聯。有上臺之賜式。庸將禮遇。庶積壽祺。

賜樞密副使陳升之生日禮物詔

陽重表節。嶽峻基神。紀蓬矢之誕祥。將綈函之私式。洪圖是翼。茂祉其膺。

賜樞密副使吳奎生日禮物詔

維時仲夏。氣盛南訛。乃生上賢。謀經右府。載歷祥弧之序。方隆政路之咨。有腆于頌。庶綏多福。

又

炎煒乘候。允執帝衡。景緯儲精。實生邦輔。方倚政塗之望。特推賜式之優。旣俾壽臧。且殊眷遇。

賜樞密副使歐陽脩生日禮物詔

進由詞宗。筦于機政。屬乘離之杪候。懷生甫之初辰。馳遣使軺。往暨私館。將牽醪之盛錫。明楹宇之叢禱。其于邇聯。不曰厚遇。

賜樞密副使胡宿生日禮物詔

經物應才。擁樞導命。涼薦仲秋之籥。慶垂左戶之弧。嘉辰協期。異數將寵。爰優近輔。蓋有舊章。

賜樞密使富弼生日禮物詔

四氣復元。太和滋物。時正上春之籥。祥開左戶之弧。稟天至清。佐國休運。受邦之錫。旣碩且多。膺歲之釐。宜昌而大。

賜樞密使文彥博生日禮物詔

夙駕鋒車已峙執圭之覲。來咨籌幄。適資借筮之謀。迎寒律于上冬。紀誕祥于左戶。爰將賜式。庸示寵懷。

又

高門發慶。良月就盈。眷乘軸之上賢。紀垂弧之吉序。將賜儀于內府。助嘉席于私庭。用輯蕃釐。蓋優碩輔。

又

歲功甫就。冬令載新。鍾賢德于高門。筦神樞于右府。夙厚四鄰之遇。特馳三閣之頒。庶助蕃休。共閱丕化。

賜樞密使張昇生日禮物詔

五行之粹。是生上賢。萬事之幾。屬在元老。南訛紀序。六射協辰。爰有頒寵。以將禮遇。

賜參知政事歐陽脩生日禮物詔

炎律徂威。高閭蓄慶。誕生賢德。來輔聖圖。將嘉賜于舊儀。助蕃釐于今日。眷言忠碩。式是倚毗。

賜參知政事王安石生日禮物詔

適正仲冬。陽氣孳于物始。乃生碩輔。忠謨翼于政機。頒內閣之賜常。助高門之續祉。宜爾昌熾。屬予寵私。

賜參知政事趙槩生日禮物詔

維時上冬。氣應寒苦。是生良輔。允迪化均。稟粹者絕其倫。數隆則蕃以錫。載臨嘉序。益裨多祥。

賜宰臣韓琦生日禮物詔

氣肇商飈。景臨辰列。爰設在弧之慶。是生上袞之賢。頒異數于朝彝。集嘉祥于族燕。俾介眉壽。長毗化元。賜宰臣曾公亮生日禮物詔。

夙賦閎謀。對經元化。屬仲陽之紀律。載左戶之垂弧。特豐鼎食之頒。且厚台衡之遇。自天錫祉。與國同華。賜使相曹佺生日禮物詔。

出元勳之緒。推外戚之賢。屬慶誕之初辰。有寵頒之舊式。茲爲異數。以助多祥。

又

位冠英貂。望尊戚苑。屬誕彌之嘉序。有慶賚之彝儀。茲寵近聯。以綏多祉。

又

望隆外戚。位貫中台。紀誕慶于嘉辰。將賜饌于上府。以續勳門之祉。以資燕席之華。式是寵私。蓋優賢舊。

又

朕尊攬羣乂。寵加近臣。矧推外戚之賢。實預中階之列。高門積厚。季夏紀生。爰將詔檢之頒。用續私禮之慶。

賜使相宋庠生日禮物詔

河嶽之靈。發爲異稟。廊廟之望。稔于老謀。履四氣之首和。紀左弧之夙慶。餼牽維碩。醪酒維清。以介壽祺。

以將禮遇。

賜保平軍節度使兼侍中賈昌朝謝明堂加恩進馬詔

曠禮之行。載涓宗祀。靈釐之委。首錫輔臣。方膺制檢之頒。遽閱貢函之上。重惟祗嚮。屢集嘆休。

賜武成軍節度使知陳州李璋南郊謝恩進馬詔

朕比者謁款上圓。布釐羣位。眷茂膺于藩寄。爰飭上于貢儀。攬牘知勤。撫懷增嘆。

賜四方館使知相州曹偕賀南郊進馬詔

載勳之後。奉寄于藩。屬慶典之丕施。飭貢儀而首及。飛函表順。置几盈褒。

賜鎮安軍節度使兼侍中賈昌朝謝給享加恩進馬詔

業懋中階。寄隆近屏。屬大祠之竣事。眷舊德以均釐。乃選上馳。以將來牘。載惟傾嚮。良用歎嘉。

賜河陽三城節度使同中書門下平章事文彥博謝給享加恩進馬詔

朕屬者涓辰上冬。合祭太廟。維明靈之顧德。首詰輔以均膺。阻覲丹庭。馳蹤逸轡。傾輸之至。嗟美不宣。

賜定國軍節度使梁適謝給享加恩進馬詔

大給之禮。朕所未行。諏辰孟冬。欽于太室。竣祠推澤。首被輔臣。駑駿天閑。良嘉忠嚮。

賜彭信軍節度使同中書門下平章事李昭亮賀給享進馬詔

屬者涓孟冬之吉。合清廟之祠。孚格祖宗之靈。翕均丞輔之福。迺馳誠于北闕。爰納貢于上閑。載諒傾勤。靡忘嘉歎。

賜虔州觀察使劉渙賀祿進馬詔

迺者孟冬之良。合食太廟。逮迎至景。休氣浹臻。輸駿上閑。形于慶牘。遵修朝矩。有尙予懷。

賜定國軍節度使梁適賀冬至進馬詔

望穆台符。寄隆邦翰。慶天元之維吉。歸時事于有司。露奏形恭。拊懷增歎。

賜外任臣僚知陳州李璋進端午馬詔

夙練戈韜。洊分方寄。當浴蘭之令節。爰驚駿于上閑。載諒勤忠。良深嘉矚。

賜賈昌朝文彥博宋庠李昭亮程戡各進乾元節上壽金酒器并馬詔

中留廟畫。外布藩條。馨輸忠瘁之深。申祝壽祺之茂。金陳御府。驥驚天閑。參具貢章。足形嘉惠。

賜鎮海軍節度使同中書門下平章事判河南富弼進壽聖節上壽金酒器并馬詔

春發歲華。宵凝月朏。載歷感樞之序。首陳薦粢之儀。言念傾勤。靡忘歎矚。

賜翰林侍讀學士知汝州劉敞賀登寶位進馬詔

朕誕膺靈命。首發慶條。有嘉禁從之虔。爰飭上馳之貢。省章知順。仄席不忘。

賜外任臣僚王拱辰等賀登寶位進馬詔

蚤分邦寄。具帥朝彝。肆予莅阼之初。爰有旅廷之貢。載循順節。曷弭褻懷。

賜康州防禦使竇舜卿等賀皇太后皇后授冊進馬詔

朕彙緣初郊。畢講巨禮。眷肅膺于寵寄。遽列上于慶儀。言念祗勤。豈忘嘆矚。

賜宣徽北院使知應天府王拱辰到任謝恩進馬詔

蚤班徽省。出保留京。念飭駕以于行。方頒條之在始。特鶩上閑之貢。且修列鎮之儀。載循忠輸。靡忘褻矚。

賜宣徽北院使知鄆州曹佺到任謝恩進馬詔

地聯中姻。心嘉外劇。留半符于上國。擁六纛于東藩。初布治條。遽馳貢禮。載惟傾嚮。靡忘嘆嘉。

賜宣徽南院使程戡謝恩進馬詔

輟自內徽。頒非常數。方倚綏于絕塞。首飭貢于上閑。載省需章。有嘉勤節。

賜端明殿學士禮部侍郎錢明逸轉官謝恩進馬詔

進繇大冊。名在禁聯。比更邊閫之符。升貳禮卿之秩。馳丹忠于魏闕。貢逸馭于星閑。載諒爾勤。良深予嘆。

賜給事中呂居簡轉官謝恩進馬詔

麟符刻玉。奉寄留都。輯上歲勞。入拜青瑣。權奇之貢。食我天閑。省牘照誠。載深嘉尙。

賜龍圖閣學士知池州王贊進方物詔

邦英之望。朝寄是膺。謹職守于藩隅。達風宜于御府。嘉省于再。予懷靡忘。

賜宰臣韓琦生日進馬詔

秋律之初。金氣已肅。紀台臣之誕慶。將內府之賜儀。遽披車服之封。復上御閑之駿。重循忠嚮。良集褒嘉。

又

望冠儒林。材經皇業。比辭上鉉之席。往總北門之符。屬誕彌之戒辰。顧匪頒之有典。煩致謝禮。良增歎懷。

賜鎮海軍節度使同中書門下平章事富弼生日進馬詔

朕肇臨大統。欣矚邇僚。紀誕慶之嘉辰。推寵頒于舊式。載披謝牘。彌諒勤衷。

又

比膺朝檢。外領藩符。極存闕之深思。虔貢庭之舊式。載循藝節。良積褒懷。

賜司農卿知滑州馬尋賀皇子加恩進絹詔

比以旌賢上嗣。疏爵近封。攬列土之飛章。充大庭而備用。有懷欽蓋。良積褒嘉。

賜外任臣僚馬尋等進賀壽聖節絹詔

茂服朝聯。肅祇邦委。屬元春之令序。紀誕日之休符。列上慶函。旅陳珍貢。載循忠嚮。良集寵嘉。

賜諸路賀封東陽郡王進絹詔

朕崇建藩屏。保強京師。眷言守土之臣。旅上充庭之貢。勤誠所嚮。嘉矚良深。

賜外任臣寮呂溱等進賀壽聖節絹詔

月朏迎年。星極感節。瞻肅膺于邦委。能遠効于庭輸。率守彌恭。興言增嘆。

賜太子賓客知相州趙良規賀封潁王進絹詔

朕丕宅皇猷。茂封嫡藩。眷分守于郡符。遠旅陳于邦貢。永言欽嘆。曷弭于懷。

賜外任臣寮呂居簡等進賀壽聖節功德疏詔

氣婉開年。慶臨誕序。乃眷邦符之守。有嚴佛事之修。披省之餘。嘉媿何已。

華陽集卷十六

內制

樞密使富弼免恩命第一劄子不允詔

朕卽位以來。惟是一二共政之臣。勤勞夙夜。以乂于王家。朕敢有爵賞之愛乎。卿以惴惴自陳。至于五六。謂錄小勞。不若報大恩。鴻惟仁宗皇帝。欲報之德。昊天罔極。皇太后。子育朕身。朕方以天下之養。以承顏于朝夕。矧敢曰養之至乎。今旣勉朕以事親之道。乃拒君命而不受。豈其言之蓋耶。夫命下而反。猶反汗也。朕初政而下反汗之命。何以視天下哉。所乞宜不允。

富弼免恩命第二劄子不允詔

先帝不以菲涼。使臨士民之上。且褒功錄德。蓋朕之先務也。維卿曩以建嗣之冊。上于先朝。方朕踐阼之初。乃銜恤去位。而恩弗預焉。夫履股肱之任。陳社稷之計。而功不獲報。豈所以勸天下哉。並遷之命。其勉承之。所乞宜不允。

樞密使富弼乞外郡第一劄子不允詔

朕承九五之尊。御億兆之衆。日有萬幾之務。咨于二柄之臣。而卿偶疾家居。露章朝聽。欲避繁機之委。將

圖便郡之行。且蹈直道者不可輕去就之分。往綏沖履。來告嘉言。所乞宜不允。

富弼乞外郡第二劄子不允詔

卿舊德之良。先帝所遺。邁羣材而奮用。更二府之倚成。比違嗇養之和。旋被康寧之福。方仄席以是念。忽請藩而自陳。賜告于家。況有漢廷之優令。永弼乃后。亦惟周臣之一心。勉輔粹神。尙綏顯服。所乞宜不允。仍斷來章。

宰臣富弼乞外任不允手詔

夫願治之主。固欲擇士。臯夔之倫。有道之臣。亦將致君。唐虞之上。故授策圖事。聚精會神。令若金石之堅。舉無毫髮之間。朕緬循前聖。登相舊人。誠罔有不及。禮罔有不至。而輔政未幾。引疾屢辭。予有經理萬物之心。而不得舒。予有飭修百度之志。而不得發。退自念此。將何望焉。雖懷君子三去之高。頗繆二人同心之利。且奉藩于外。亦已厭黽勉之勞。然論道于中。豈不嫻優游之望。毋專沖守。終仰丕成。所乞宜不允。仍斷來章。如心氣未寧。且輔近醫藥。不須更求郡。以體朕眷注之意。

宰臣富弼乞退不允手詔

朕思帝虞之朝。臯夔輔德。始終一心。以垂休于無窮。豈有輕去其位。而圖處身之佚哉。惟卿負大材于天下。相予五年。克勤于王家。今方講太平之務。忽以告辭。豈朕之不明。而廢厥謀。將讒邪害正。而廟廊之論。

難施歟。否則卿何疑焉。朕固灑然。注意于卿。卿之自視。下爲士民之所信愛。是宜乘節不顧。畢慮于有爲之時也。爾尙宅乃事。無俾臬變之專美有虞。所乞宜不允。

宰臣富弼乞解機政不允詔

朕承祖宗之烈。履士民之尊。思茂經于治原。故歷卜于賢輔。以卿暴大名于天下。推全德于三朝。屢遣使。輶之行。審從齋閣之訪。遂復來相。庶幾仰成。若作室而汝墉。若濟川而汝楫。朕之所遇。顧豈不隆。何意歲時之未周。而引疾患之爲計。間或咨于丕務。似有祕于嘉謀。忽此露章。乃欲避位。大失初終之望。重爲上下之疑。豈朕臨政之不明。涉道之猶寡。使卿外示弗強之力。內懷欲去之圖。予心漠然。中夕永歎。且賢者道欲行己。要澤物于一時。忠臣義不忘君。肯愛身于當國。諒素存于耆慮。勉起翼于皇機。所乞宜不允。如氣體果未安。且在告齋。將以佗痊平。

判亳州富弼乞罷使相不允詔

朕初臨丕基。首選大吏。方勞精而共務。忽引疾以屢辭。去雖踰于歲年。念不舍于朝夕。適覽奏函之旤。又將使袞之還。且重祿所以賦上賢。樂羣所以優舊德。宜收曲慮。終保高名。所乞宜不允。

判河陽富弼乞罷使相第一表不允詔

夫祿賦于賢。則有勸功之道。名當于位。則無假器之嫌。卿推舊政之良。膺兩朝之遇。不見踰歲。猶思武帳。

之冠。何疑上書。欲歸丞相之紱。矧聞風力之彌劬。步趨之已平。其安出處之常。以厭中外之望。

富弼乞罷使相第二表不允詔

卿名德之重。表儀羣倫。代天熙工。厥有成績。間請自外。亦既彌年。神明懌和。靡福不及。來咨來度。不我謂遐。胡爲弗寧。願上相紱。監微防損。無乃過思。圖維厥終。尙迪朕志。

富弼乞罷使相第三表不允詔

朕猥膺大統。尊見舊臣。方謀治于朝廷。益倚綏于方嶽。何意露章之及。重形還節之文。載畫一之歌。終念鄴侯之前略。起穆如之誦。猶期山甫之邁歸。其體注思。更要省慮。

富弼乞罷使相第四表不允詔

卿兼文武之資。秉將相之任。以疾去位。旣從逸于近藩。何疑上書。每願還于重紱。雖勤服于深識。然終後于羣瞻。化召南之正風。尙煩于分守。觀漢廷之故事。多出于前規。其止重陳。且需來顧。

富弼乞罷使相第五表不允詔

在昔先朝。載謀舊德。不圖離疾。力謝政機。以至去都。游更氣籥。肆膺連歷之御。莫遏德音之聞。奚爲底書。數欲上綬。且徇情加惠。本均左右之勞。雖處厚辭隆。何替安危之倚。孤節白守。微文可獨。

宰臣韓琦免恩命不允詔

先帝不以菲涼。使主宗廟。而卿承顧命。定大冊。諸臣未有以先之也。朕方推恩天下。而于一二股肱之臣。蓋亦攷尋故事。而甄序之。卿乃過陳悃愾。至於再三。夫輔立兩朝。而功不獲報。豈朕所以褒賢錄德之意哉。且稽祥符之制。則遷官恐未爲過。比乾興之除。則兼職猶不加厚。卿何疑而固辭。今朕初臨大政。而將使命反如汗。丞相豈不爲朝廷惜哉。所辭宜不允。仍令貼麻。依舊封魏國公。

韓琦乞退第二劄子不允詔

蓋聞二帝之時。君臣相與始終。輯大治。享大榮。以施諸無窮。朕甚慕之。日者先帝不以菲德。使奉宗廟之祀。而丞相嘗預定大策矣。今與朕共濟之。可乎。君爽之戒曰。罔不能厥初。惟其終。卿其申念之。往恭用治。毋斃。所乞宜不允。

韓琦乞退第三劄子不允詔

昔帝舜嗣位。猶戒一日萬幾之難。高宗宅憂。以聽三年冢宰之治。顧予甫膺聖序。夙夜敢遑。實賴輔臣。左右以濟。惟卿之計。罔有弗交。何嫌疑而上書。欲逡巡而去位。且馮拯嘗受真宗之託。然疾乃聽辭。張昇亦承文考之遺。雖老不得謝。矧卿賦有康寧之德。未及風力之衰。與其退營便安之私。孰若進敷美利之澤。七頒詔諭。豈不予從。所乞宜不允。

宰臣韓琦乞退第三表不允詔

夫士之砥名行。蒙寵祿者。豈徒致主唐虞之上。亦欲廁身稷契之列。故時至則遂行。道行則勿休也。今卿名蓋于四海。功施于三朝。乃曲徇自滿之戒。繼陳欲去之辭。使朕朝念而皇皇。夕思而耿耿也。矧賜書之數下。益上牘之靡回。且天子之令惡于煩。大臣之舉惡于輕。朕言已孚。其起安位。所乞宜不允。

宰臣韓琦不赴文德殿立班待罪不允手詔

天子之御正朝。久而未講。宰相之班百辟。後亦從隱。攬臺簡之忽陳。規邦彝之寢略。蓋延英賜對。每踰中昃之咨。故宣政留班。不及大昕之謁。矧在職之匪懈。奚引愆而靡寧。宜斥細嫌。用綏素臚。所待罪宜不允。仍斷來章。

判大名府韓琦乞移徐州不允詔

卿頃去鼎司。出均藩寄。自易官符之守。良紓邊瑣之憂。殊鄰輯寧。屬境恬豫。適還四路之劇。且閱舊臣之勞。何煩纓章。更欲徙郡。夫慮周者在于體國。忠至者不以徇身。勉奮精神之和。奚止翰垣之倚。所乞宜不允。

鎮安武勝等軍節度使守司徒兼侍中判相州韓琦免恩命不允詔

朝廷之設名器。所以待天下士之賢。兩鎮節度使雖未嘗除。非有所愛。誠有以待之也。今卿歷相三朝。功烈休顯。抗言引去。朕歉然有不足于心。推求恩禮。惟恐遇卿之薄也。夫冠四輔之位于內。領兩使之節于

外。願其勢執重執輕哉。尙何辭焉。所辭宜不允。

樞密使文彥博免恩命不允詔

朕賴祖宗之靈。獲保大業。體天地之德。遂澤多方。而卿適擁天下之樞。預定禁中之冊。逮猷告于列位。蓋體循于舊彝。罔羣言之弗同。敢高爵之是愛。矧仁廟不忘乎河北之難。先朝嘗稱有王佐之才。尙懼尊禮之未昭。何循謙沖之靡已。且西雍節制之拜。旣以外更。而文昌端揆之名。蓋還前命。理無可避。寵實爲宜。所辭宜不允。

樞密使文彥博免恩命第一劄子不允詔

卿于藩之行。去國未幾。方趨還于帥鉞。俾進翼于神機。何剡牘之遽來。欲辭權而自遠。矧羌視起勾廉之水。邊氓思短後之衣。日妣勝謀。宜獨沖節。所乞宜不允。

文彥博免恩命第二劄子不允詔

王者量材而授官。君子審能而當位。故任重者被責大。德厚者蒙爵尊。矧卿昔在先朝。嘗居上宰。方邊隅多事。旣仗以旄鉞之行。及左右虛賢。又委以樞機之政。且功趨時者不可失。名適分者不可辭。式佗遯歸。以符素曠。所乞宜不允。

文彥博免兼侍中劄子不允詔

朕遇二府之意隆矣。蓋左調陰陽。右鎮四夷。皆宰相之任也。今召用卿。而猶恐恩禮之未稱。乃欲上還納言之官。豈朕意哉。往卽乃服。毋廢予之前訓。所乞宜不允。

起復冠軍大將軍左金吾衛上將軍員外置同正員依前成德軍節度使同中書門下平章事判河南府文彥博免恩命不允詔

卿位履將相。不幸有喪親之憂。朕用故事以哭踊之。卒而復位于常。乃創鉅之情。執禮而不可奪。朕亦遭家不造。不能行高宗諒闇之事。顧已薄哉。夫與國者忠之至。顯親者孝之大。忍私徇義。可不勉乎。所乞宜不允。

判河南府文彥博乞罷使相第一表不允詔

乃孟夏壬寅。以成德之節。左揆之章。命爾以太原之行。朕惟卿有奉親之難。故改釐西都。又聽以還。加秩之拜。猶俯而未安也。願得舊鎮以領之。吁。何其辭避之至也。夫爵祿者天下之砥石。誠所以礪世也。朕于卿惟恐弗及焉。所乞宜不允。

文彥博乞罷使相第二表不允詔

卿早負大名。嘗更重任。自罹憂之去位。逮終制以還朝。儀形未親。寤寐如渴。奚再形于封奏。欲過避于寵榮。矧文武之舊臣。有忠孝之高節。往祗茂冊。入告嘉猷。所乞宜不允。

判大名府賈昌朝乞罷使相第一表不允詔

夫外經皇邑。均神奧于邦中。北帶洪河。極形勝于天下。置朱門之別筭。倚玉鉉之前良。況民思惠愛之深。敵識威聲之舊。告謨列位。寵以答功。厲節當朝。義無廢禮。顧重守方之寄。猶輕易鎮之名。還總帥權。趣祗廷渙。所乞宜不允。

賈昌朝乞罷使相第二表不允詔

夫謀在廊廟。中以仰于丕誠。職于藩宣。外以穆于至化。交爲王室之倚。參重臣鄰之欽。按舊府于北邊。崇別都之一會。適委官符之守。洊煩齋鉞之行。顧威重足以服戎心。惠綏足以裕民力。載稽夙望。允契僉言。旣敷號以旌勤。迺繼章而露悃。蓋懷經世之才者。處難就佚。存許國之義者。勳思圖庸。當厲壯猷。往祗定命。

賈昌朝乞罷使相第三表不允詔

朕猥以眇躬。新承聖緒。雖日念艱難之大業。猶未識輔弼之舊臣。矧北道當戎馬之衝。別京主筭籥之重。臨機制勝。旣倚之勁謀。美俗流風。亦申夫茂績。遽願還于相紱。且斬解于邊符。豈未追體貌之儀。將自壓官職之事。露章三至。良用憮然。所乞宜不允。

賈昌朝乞罷使相第四表不允詔

夫徇大節者。不謀其身。膺大名者。必澤乎世。眷言舊德。契我先朝。入登三世之臣。出長萬夫之政。載清淨于邦畫。布中和于民聲。乃越月以來。奏章數至。且擁旄北道。方資誓國之靈。而還節上臺。難議易藩之命。詔音比下。毋或重陳。

賈昌朝乞罷使相第五表不允詔

卿被知先朝。更枋二府。給符居守。雅聞善績之凝。賜節來朝。屢告嘉言之益。方就安于輔郡。乃還上于將旄。雖高避寵之懷。未究尊賢之體。所乞宜不允。

判大名府賈昌朝乞辭陵不允詔

七月初。靈輜將御。三川之下。寶劍空留。眷言同德之良。實契先朝之遇。愴懷恩于奮幄。思灑奠于新郊。然以領一道之麾符。控北方之襟帶。正倚坐綏之策。莫循來赴之情。所乞宜不允。

翰林學士尙書兵部員外郎知制誥吳奎乞知青州不允詔

卿強學博覽。足以通古今。嘉謀讜言。足以承顧問。朝夕獻納。余有望焉。矧方委之劇煩。嬰以事任。懋乃賢業。宜有施于朝廷。奮乎壯猷。豈暇便于鄉里。其安爾職。深體眷懷。所乞宜不允。

樞密副使吳奎免恩命第一劄子不允詔

卿才爲衆推。資與時會。曩從大冊之對。寢履近途之縣。嘗感慨以進規。亦周旋于試劇。適資峻德。升筭宥

司圖前筭之勝謀。導北樞之密令。爰爲上牘。乃覲還恩。往肅以承。勿封于執。所辭宜不允。

吳奎免恩命第二劄子不允詔

夫廊廟幹于化原。帷幄籌以幾事。朕之慎所出令。難于用人。以卿曩預訪聞之求。屢陳忠讜之益。才試浩穰之決。謀登宥密之咨。蓋稽衆之雋名。豈彛資于大任。何繼騰于讓牘。欲深避于寵途。且爲國澤民。則義有所重之顧。因賢予祿。則誠無未安之疑。起卽被于制綸。往參熙于神務。尙虛爾位。有鬱予聞。所乞宜不允。

奎免恩命第三劄子不允詔

天子惟君萬邦。建時百辟。以祇迪于乃事。矧曰左右之臣。以朝夕承乂。乃辟予敢有弗欽。爾克懋乃猷。茲庸命爾圖厥政。爾乃陳所以固辭。朕命者三。朕思有虞之世。羣臣皆讓。亦莫安厥位。終敕之曰。俞汝往哉。爾弗逃聞于前人。其率時訓。惟厥中。嗚呼。慎爾止。毋倚乃身。乃罔弗孚于休。所辭宜不允。

起復樞密副使吳奎免恩命不允詔

夫天下之喪。雖乃達禮門外之治。蓋有斷恩。故移君以忠者。孝之隆。合世之變者。權之大。卿自離家難。奄隔歲華。思舊人之復來。已深詔之屢下。義形憂國。矧多金革之虞。哀極思親。不在苴麻之飾。審從明分。其起輔予。所乞宜不允。

參知政事吳奎免恩命劄子不允詔

朕以眇身託于士民之上。實賴左右忠賢之臣。而共濟之。維卿秉節據正。被遇三朝。雖位在外藩之下。而嘗受仁廟之遺。進預大政。朕敢有後乎。彙牘之來。祈還定命。徒嘉卿濟濟相推之意。願不得是從也。所辭宜不允。

華陽集卷十七

內制

使相判亳州宋庠乞致仕不允詔

朕惕守基序。歷日未深。勤思俊賢。輔己不逮。載省披于藩奏。願退老于家傳。矧先帝大臣。德望光美。淮南近服。民風樂聞。至若沴雨乘秋。良疇變野。朕不能引咎而塞異。卿乃欲緣災而退身。雖諒乃誠。匪安予倚。所乞宜不允。

翰林學士承旨宋祁免恩命不允詔

卿早以瓊材。延于近侍。洊屈使符之守。居懷詞囊之英。宜還預于禁游。且進承于密旨。況智略足以經國。論文章足以粵帝謨。奚爲露章。乃至引疾。方圖朝夕之訪。勉近醫藥之良。毋執沖懷。卽祇嘉命。所乞宜不允。

端明殿學士知鄭州宋祁修唐書成免恩命不允詔

朕惟唐室之興。耳目之所接者未遠。觀劉氏所著舊史。乘筆于倉卒之際。使當時君臣事業。鬱而靡彰。朕甚悼焉。頃詔文學之臣。更纂其異同。比上送觀。蓋有十七年之功緒。雖卿奉職于外。然採集放失之聞。考

之行事以論次一代之典。顧積厥勩。左轄之司。名秩雖重。然亦出于例遷之恩爾。卿何辭焉。且伏奏之日。嘆于滯留。朕亦懷卿之耿耿也。所乞宜不允。

觀文殿大學士龐籍乞致仕第一表不允詔

朕聞唐虞之朝。君臣上下。秉心一德。烏爲間言之所移哉。是以聖賢始終榮華。至今流問無窮。卿稱冒丕德。嘗股肱于予躬。雖爾身在外。迺心無不在王室。朕方咨于老成。遠思二帝之治。乃据經引年。願上印韞以歸。豈所望焉。卿其輔養精神。毋追高一時。以遺愛君及民之義。爾尙宅爾常。以永邦之茂命。所乞宜不允。

龐籍乞致仕第二表不允詔

夫禮高年。尊有德。三代之所以起治興道也。矧嘗與朕共圖天下事。而時所謂元老之臣。朕敢輕其進退哉。卿頃實相予。秉義忠一。勤勞夙夜。厥功茂焉。何感而上書。願乞骸以歸者。至于拳拳。況今靡摠以官職之累。其安以奉朝。讜謀嘉猷。勻以告朕之不逮。若遺榮之事。則所未聞。所乞宜不允。

翰林學士歐陽脩乞洪州不允詔

昔漢蕭望之雅意在本朝。不欲遠爲郡守。誠自以議論有益于時。不忘愛君之義也。卿學通古今。明于治亂之原。朕常所咨訪者也。學士之職。可謂地近而責清矣。何感而上書。願請南昌之符。雖近于故鄉。而豈

不去國之遠乎。茲于朕非所以見愛也。況秉德以寧。視聽不衰。其安于位。以永享其休名。所乞宜不允。

翰林學士歐陽脩修唐書成免恩命不允詔

朕惟唐有天下三百年。迹其所以廢興之由。厥監未遠。及觀書史之文。則煩而靡要。是非頗謬于所聞。頃因命官更纂其本末。十有七年。而後書成。然非卿筆削之。則莫能示法于將來。今例遷一秩。猶未足酬歲月之勞。刻章以陳。良爲曲讓。所辭宜不允。

樞密使張昇乞致仕不允詔

朕觀前代求治之主。固有屈己以就詢黃髮之言。矧舊惟共政之臣。年耆而德茂。此朕朝以丐所告。而夕以圖所補也。卿進更柄府。勤勞五年。乃自春以來。引疾杜門。介然有歸老之請。朕念卿忠瘁之深。形于顏色。雖欲嘉遂高沖。顧不以國事爲重乎。勉服于位。其體朕素以祈佇卿之意。所乞宜不允。

張昇乞致仕劄子不允詔

北極之躔。筦于神務。二枋之府。倚以老成。矧文考之夙咨。顧沖人之初政。引年遽去。則體國之義微。省牘將從。則遇賢之禮薄。雖陳六不可之畫。蓋有兩未安之懷。勉自嗇綬。庶符委佇。所乞宜不允。

判許州張昇乞致仕劄子不允詔

夫君子之行己也。要得進退之時。故二帝之朝。有合慮之賢。無去位之老。朕初卽天下。思與忠碩之臣而

共治之。豈卿欲退之時哉。其近醫藥。專精神。以自扶持。若乃杜門聽命。朕何望焉。所乞宜不允。

使相判許州張昇乞致仕第一表不允詔

卿彙秉政機。屢辭顯重。自均藩寄。甫便燕私。奚爲上牘之來。重有遺榮之舉。且陳諸止足。雖慕昔賢之高。然稽之典型。孰如元老之輔。勉綏吉履。終憲惇言。所乞宜不允。

張昇乞致仕第二表不允詔

卿早以碩望。列于輔臣。比睠年德之高。聽解樞機之務。旣優以陪藩之寄。又寵以台鉞之行。歲月未逾。封章疊至。況庭無滯訟。足資臥閣之閒。而地在故鄉。不爲衣錦之樂。高情雖至。舊政寧忘。所乞宜不允。

張昇乞致仕第三表不允詔

卿孤風少附。耆德益明。自辭柄府之勤。適就陪藩之佚。徒念山川之間。每極思賢之懷。轉顧日月未逾。奚爲謝事之請。雖屢形于指諭。靡具體于瞻求。誰如將相之榮。更游于故里。終及京師之福。以望于老成。申釋舊勞。難諭嘉退。所乞宜不允。

張昇乞致仕第四表不允詔

夫經遠務者。須舊德。濟大忠者。忽細圖。眷言黃髮之良。方就朱轡之逸。謝權鈞軸。況與俗之自高。請老邱園。猶上書之不已。雖迹風懷之厲。頗申指諭之煩。似未深體國之思。何不滿對時之望。往卽安服。居毋費

辭所乞宜不允。

端明殿學士知大名府王拱辰免恩命不允詔

朕承先帝遺業。思與賢士大夫興治天下。其于委遇。豈有內外之間乎。大名主別京之鑰也。以卿望重而名美。故以付之。令加秩一等。豈厭朕所以待之之意。尙何辭焉。所乞宜不允。

知大名府王拱辰乞暫赴闕朝覲不允詔

卿久去禁游。游更藩寄。屬肇承于題序。斬入展夫覲儀。睠全魏之山河。主別京之筦籥。方用資于鎮撫。未及對于清閒。爲北京久闕官。所乞宜不允。

知河南府王拱辰免恩命不允詔

卿夙揚瓌望。徧履顯途。比勞西戍之師。宜主別都之籥。大用猶屈。至懷益沖。維洛邑天下之中。秋官文昌之貴。蓋地重則君倚異。秩峻則民瞻崇。屬在兼材。實無閒論。方賴保釐之舊。豈煩悃愾之陳。往安而居。當體予遇。所乞宜不允。

端明殿學士知定州王拱辰免恩命不允詔

夫全趙之總萬兵。蓋其據戎馬之衝地。學士之兼三組。豈不極文翰之高選。以卿業由畿府。謀有將機。旣委以中山之鎮。又寵以戶卿之行。庶俾任隆而恩稱。望重而勢立。忽攬連牘。願官近親。雖美志之有昭。莫

舊文之曾比宜欽。劇屬姑略。冲撝所乞宜不允。

知定州王拱辰乞再任西京迎奉靈駕不允詔

大行不復。鉅創攸同。七月戒期。三川在望。忽觀需牘。願奉靈輿。然以總連帥之權。控強鄰之境。方賴守封之畫。難從易寄之行。所乞宜不允。

知定州王拱辰乞移許州不允詔

卿夙以瓊名。階于撫仕。自違辭橐之從。洊易邊符之行。流年變陰。側席馳想。眷中山之鉅屏。拱朔野之三關。擁一道之全師。須萬里之沈畫。爲國重寄。擇時美才。宜卽于宣。諒難圖佚。所乞宜不允。

宣徽南除使判延州郭達免恩命不允詔

卿武足衛社。謀能制邊。時乃將臣之良。實推戎落之重。適更臨于內鎮。尙留倚于西陲。宜體注懷。毋煩冲避。所乞宜不允。

判延州郭達乞京西一郡不允詔

卿守在要防。居有重望。恩信足以懷士卒。威略足以動羌夷。正仗折衝之圖。遽呈厭劇之請。矧敵情之難度。方邊備之益修。尙輯乃勞。用安予倚。所乞宜不允。

三司使韓絳乞外郡不允詔

惟三司總天下之計。而正使亞二府之列。故事劇則慎所任。秩重則難其退。方倚心術之裕。以制邦用之廣。忽辭以疾。有悌予聞。姑勉嗇于至和。終蒙濟于丕利。所乞宜不允。

端明殿學士知成都府韓絳乞內郡不允詔

井絡之區。其地阻而俗蕃。常擇通材。篤望之臣。以鎮守之。方春發生。朕哀遠民之失職。卿乃求徙內郡。豈稱所以宣布德澤之望乎。矧卿精力素強。果于臨事。忽茲引疾。良悌予聞。所乞宜不允。

資政殿學士知河中府孫沔免恩命不允詔

卿早事先朝。嘗更二府。材匪難而弗濟。年未至而遽休。朕甫宅丕圖。有懷夙艾。特起林泉之逸。就頒章組之華。儀形未親。封奏來上。夫圖功名者。蓋賢人之事。識卷舒者。亦君子之宜。往勵壯猷。尙欽寵遇。所乞宜不允。

孫沔免恩命劄子不允詔

朕疾世競名。則嘉彼遺榮之士。因時用武。則思夫制勝之臣。卿被遇先朝。嘗任大事。歸休故里。已蹈高風。屬興疆場之虞。遂還官職之舊。夫維過執于撝節。孰若進圖于茂勳。其免受書。撫我西略。所乞宜不允。

觀文殿學士知慶州孫沔免恩命不允詔

朕觀先帝時。卿每有除命。則逡巡固辭。又年未及老。而上還君事。可謂有難進之風矣。今羌人跳梁。朕特

起卿屬以疆陲之虞。非若平日之可辭也。夫退而敦厲風俗。進而圖立事功。不亦偉哉。所乞宜不允。

宰臣曾公亮免恩命劄子不允詔

卿先帝大臣。屬以輔朕躬。帥百寮。秉誼不怠。功其茂焉。始朕卽位之初。恩施于天下。而丞相之秩。未加典外。固常慊然在心也。今厚陵復土。方親庶政。所與朕共承社稷。安元元。獨丞相一人。豈無恩禮以昭朕意乎。夫勞大者。予祿厚。德盛者。獲爵尊。義不得以固辭也。所辭宜不允。

宰臣曾公亮不赴文德殿立班待罪不允詔

路朝之制。雖著常班。憲府之文。蓋繩墜矩。矧在秉鈞之地。日虔辨色之趨。事有從宜。初非不恪。奚露章之亟及。乃引責而自深。載披所陳。良拂予聽。所待罪宜不允。

宰臣曾公亮以下議宗室封爵不當待罪特放詔

朕惇骨肉之親。廣封爵之典。而有司失于博考。布令乖乎適從。既推義之所安。自疏恩之惟允。矧總裁于大政。誠日委于繁機。宜寬引咎之文。姑體遇賢之意。所待罪特放。

觀文殿學士程戡乞致仕不允詔

夫士之難進。則風節厲。國之上賢。則名器尊。卿識量閎粹。材謀敏彊。預政七年。盡忠一德。迺援經辭寵。抗牘露衷。豈涉降之厭勞。抑讒訾之惡直。今以陪紳祕殿。侍橐禁林。且事佚而道益沖。地清而責靡至。猶執

謙挹以斬退休。雖懷拂世之高。恐負優賢之望。勉祇予渥。難徇爾陳。所乞宜不允。

宣徽南院使判延州程戡免恩命不允詔

卿氣尚方嚴。才資肅給。歷職二府。輸勞六年。調以風教之和。底于疆陲之靖。比願還于機柄。甫來侍于經帷。有懷前謀。殊屈大用。會更西帥之律。進陟內徽之廷。朕倚則深。汝辭毋再。所乞宜不允。

判延州程戡乞退不允詔

卿頃在先朝。嘗更二府。自出守于邊寄。顧游易于年陰。而賊態靡常。寢生狂忽之患。方隅多事。久藉鎮綏之謀。乃于此時。欲去其位。雖亮昔陳之悃。且非素貯之懷。所乞宜不允。

判延州程戡乞致仕第一表不允詔

卿昔嘗陪予議政于巖廊之上。今年耆而德隆。朕益所加遇者也。矧延川一道。臨蕃夷之吭。實賴卿鎮撫之。何疑而上守邊之印以歸。是薄朕忘舊故之臣。而期以自高者也。惟強餐持神。遠思疆事。雖未能圖玉關之復。固已寬予西顧之憂。所乞宜不允。

程戡乞致仕第二表不允詔

卿向解政機。卽臨邊瑣。隱然自重。鬯國威于無垠。折其未形。有廟勝之前略。肆予纂緒。屢以引年。如聞風力之彊。足扞疆陲之事。念綏遠俗。終倚壯猷。所乞宜不允。

程戡乞致仕第三劄子不允詔

延爲靈夏之吭。而比年以來。羌人弗諱。數擾我邊氓。方飭兵重屯。以講廟勝之策。而卿總制在延。爲日蓋久。實賴威名以鎮守之。乃數上書。願還官職之事。豈朕所望。所乞宜不允。

梁適乞換文資不允詔

卿早以傑材。固嘗陪予廟堂之論矣。今稍攬疾疢。遽欲遷上忠武之節。豈朕所以遇大臣之體哉。矧河橋近藩。非有邊瑣之虞。其專精神。近醫藥。以自扶持。詩不云乎。樂只君子。遐不眉壽。其庶矣夫。所乞宜不允。

知兗州梁適乞致仕不允詔

卿蚤繇碩望。嘗又近司。逮紹履于至尊。頗更臨于外服。晝咨未接。時論無虧。奚糸疏于衰侵。乃固斬于謝去。蹈仲尼之訓。雖高易退之懷。聞傳說之書。尤重有終之戒。往安攸處。毋拂予衷。所乞宜不允。

忠武軍節度使知河陽梁適避祖諱免恩命不允詔

國家優秉政之舊。則禮莫與盛。疇撫邊之勞。則寵易爲豐。眷大鹵之夙勤。請三城之游治。加視上司之秩。進疏舊許之封。渙命班于大所。羣謀合于遠慮。初聆制檢之暨。遽達讓函之來。〔案〕此下原缺六字復推忠武之避。雖遠嘉于美志。然終答于成勳。其往肅承。以昭欽倚。所乞宜不允。

檢校太尉兼侍中曹佺免恩命劄子不允詔

朕纂祖之休。顧義爲天下重。繩民以化。知孝于人道先。故愷然有恩。以交乎中。必渙然有文。以施乎外。每懷慈壽不報之德。且旌武惠多賢之祥。適告大廷之書。而百僚之聽靡不合。非假三牲之養。而四海之風。何以形。維是定謀。良難固避。所辭宜不允。

宣徽北院使保靜軍節度使曹佾乞邊任不允詔

夫錄元勳者必褒其後。託外戚者必榮其家。積有通規。實無過寵。卿履高華之序。抗忠義之懷。屢形囊封。願試邊瑣。然矜功名者。誠昔人所慕。蓋保富貴者。亦當時所難。矧屬邦國之熙。曾無疆事之警。宜留密侍。益導嘉猷。雖高乃誠。莫徇茲舉。所乞宜不允。

保平軍節度使同中書門下平章事判鄆州曹佾免恩命不允詔

朕夙承慈訓。祇適丕圖。有懷外戚之良。矧出元勳之裔。名秩未稱。予心慊然。適登命于台司。尙倚綏于東土。忽覩需奏。漸避寵章。蓋叶僉謀。所宜欽受。所乞宜不允。

樞密副使邵亢乞外郡第一劄子不允詔

夫廊廟之上。日計國之安危者。惟是一二執政之臣。矧卿從朕東朝。用以不次而處之不疑。孰施而弗可乎。且士常患不得其位與時。故不能盡其材。今卿時逢而位著矣。不進與朕共圖天下務。而乃引疾。自言思鄉郡而去歸之。豈朕腹心之望焉。所乞宜不允。

邵亢乞外郡第二劄子不允詔

朕惟自昔攀附之臣。固多發忠憤。蒙爵位。以取一時之榮。豈不偉哉。卿早以德義傅朕。而預政未幾。奚爲數陳筋力之不強。視聽之不明。而欲以去朕也。且爲國之道。在篤于任賢。而不可移。詩云。我心匪石。不可轉也。今進未踰年。而遽去之。不亦使朕得轉石之譏乎。其安于位。毋人言之是恤也。所乞宜不允。

武成軍節度使知鄆州李璋免南郊加恩不允詔

朕卜歲習吉。大旅于郊。三靈顧歆。敢曰能饗。維時內外。咸致厥勤。承神之釐。肆爲休命。其往欽受。毋重以辭。所乞宜不允。

李璋免恩命不允詔

朕踐阼之始。澤及四遐。矧予親賢。守在藩寄。豈無褒寵。庸答爾勞。毋或固辭。以格成命。所辭宜不允。

知潞州李柬之乞西京留臺不允詔

壺關控太原之道。亦朕股肱郡也。卿以儒雅。進而達于世務之宜。故出爲郡守。流于美聲。近歲以來。何恙不已。夫退領閒務。曷若臨政惠民之深。其專精神。近醫藥。以自扶持。憲臺別印。非朕惜之。所乞宜不允。

端明殿學士知定州張方平免恩命乞侍養不允詔

朕惟河北天下之根本也。況中山一道。兵衆而民蕃。可謂重寄矣。願非敏謀篤望之臣。未易遣之。夫春秋

之誼。不以家事辭王事。卿何辭焉。所乞宜不允。

觀文殿學士孫抃乞致仕不允詔

卿早事先朝。嘗更二府。道淹久而彌篤。年未至而請休。雖懷絕俗之風。豈厭遇賢之禮。往綬多祉。來告嘉猷。所乞宜不允。

定國軍節度使李端愿乞致仕不允詔

卿獻穆之子。神德之孫。生長富貴。而不自矜。出入忠義。而無所顧。何意屬疾。稍闕便朝之咨。奚爲上書。欲還膺鉞之寵。竚復神明之觀。來將著定之儀。謝事之文。毋煩桑布。所乞宜不允。

判定州李昭亮乞宮觀及移郡不允詔

夫大河以北。蓋天下襟喉之地。而總師之臣。可易屬哉。卿以勳戚之舊。履將相之貴。更歷中外。輸勤一心。何感而上書。願解邊劇。以自適。豈朕所以屬老成之意耶。且年隆而知愈深。寵至者倚彌重。宜安乃服。以永時之休名。所乞宜不允。

翰林侍讀學士知鄆州賈黯免恩命不允詔

卿器遠識冲。行端文富。早魁辭科之選。亟參法從之游。自終制于喪廬。屢請分于郡契。朕惟金華隆于講席。南陽寵于故鄉。矧道足以備朝夕之咨。望足以鎮江漢之俗。奚煩露牘。更就徒靡。毋循小嫌。姑從素欲。

所乞宜不允。

樞密副使陳升之免恩命劄子不允詔

朕惟本兵之司。安危所繫。執政之任。賢峻是圖。適咨僉論之同。允謂至公之進。亟參宥畫。宜略摛文。所乞宜不允。

兵部員外郎知制誥知江寧府錢公輔待罪特放詔

先王制禮以率恭。作刑以明威。所以使民遷善而革暴也。今愚民無知。至有犯殺兄之罪者。相繼而不止。豈朕禮教之不立。刑罰之不明哉。雖然。亦在有司與行之。所待罪特放。

翰林學士權知開封府馮京待罪特放詔

京師大衆之居也。而化不能以日見。乃無知之民。悖于義理。朕甚悼焉。卿尹正天畿。列章自咎。省披之餘。有矜予懷。所待罪特放。

龍圖閣直學士知河南府韓贄待罪特放詔

夫上之化下也。不可以戶曉。故雖盛治之世。不能使民不犯于有司。今河南之民。陷于重辟。朕甚憫之。傳不云乎。刑期于無刑。曷爲引咎之來哉。所待罪特放。

